

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI SELASA : 12 NOVEMBER 2019

**PEMBERITAHUAN PERTANYAAN LISAN
MESYUARAT KETIGA DEWAN RAKYAT, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : PUAN NOR AZRINA BINTI SURIP
[MERBOK]**

TARIKH : 12 NOVEMBER 2019 (SELASA)

SOALAN

Puan Nor Azrina binti Surip [Merbok] minta MENTERI PEMBANGUNAN WANITA, KELUARGA DAN MASYARAKAT menyatakan sejauh manakah cadangan Kementerian untuk menaikkan kadar elaun penyelia dan petugas Pusat Pemulihan Dalam Komuniti (PDK) dan sejauh manakah usaha Kementerian bagi memastikan hasrat ini tercapai.

JAWAPAN

Tuan Yang di-Pertua,

Terdapat perbezaan antara elaun dan gaji, di mana elaun merupakan bayaran yang diberikan kepada seseorang yang bertugas secara sukarela di sesebuah organisasi seperti di Program Pemulihan Dalam Komuniti (PDK). Manakala gaji adalah suatu pemberian upah tetap yang diberikan oleh majikan kepada pekerja. Penyelia dan Petugas PDK yang dilantik merupakan sukarelawan yang bertanggungjawab untuk merancang dan melaksanakan aktiviti di PDK.

Sehingga kini terdapat sebanyak **560** buah PDK yang memberi manfaat kepada **20,573** OKU di seluruh Negara serta melibatkan seramai **560** orang penyelia dan **2,765** orang petugas yang membantu mengendalikan program tersebut. Dari tahun 2015 sehingga Julai 2019 kerajaan telah membelanjakan sebanyak **RM173 juta** untuk membayar elaun penyelia dan petugas PDK di seluruh Negara termasuk pembayaran KWSP dan PERKESO.

PDK merupakan program berasaskan komuniti dan mulai tahun 2018 telah pun dikuatkuasakan agar semua PDK mendaftar sebagai NGO di bawah Jabatan Pendaftaran Pertubuhan Malaysia (ROS). Tujuan utama PDK telah didaftar sebagai NGO adalah untuk memastikan pengurusan kewangan dan aset PDK yang sebelum ini dipengerusikan oleh ahli keluarga YB termasuk isteri-isteri YB dan sebagainya diuruskan dengan kurang berkesan. Ini sedikit sebanyak telah menjejaskan pengurusan kewangan PDK. Kini sebagai NGO yang berdaftar diharapkan PDK akan diuruskan secara lebih teratur dan mengikut tatacara pengurusan kewangan NGO seperti yang ditetapkan oleh ROS.

Jawatankuasa PDK yang mendaftar sebagai NGO boleh mencari dana melalui penajaan pendapatan sendiri dan sekiranya PDK berkemampuan membayar elaun Petugas dan Penyelia PDK dengan kadar yang lebih baik, ia tidak semestinya terikat kepada bayaran Petugas sebanyak RM800.00 dan bayaran Penyelia sebanyak RM1,200.00 sebulan yang diberikan sekarang ini.

**PEMBERITAHU PERTANYAAN LISAN DEWAN RAKYAT
MESYUARAT KETIGA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI ABDUL AZEEZ BIN ABDUL
RAHIM [BALING]**

TARIKH : 12 NOVEMBER 2019 (SELASA)

SOALAN NO. 2

Minta **MENTERI PERTANIAN DAN INDUSTRI ASAS TANI** menyatakan adakah cadangan dan inisiatif kepada penanaman nanas berupaya membantu sara hidup pekebun sawit atau getah, dan sejauh mana penanaman tersebut mampu menjana keberhasilan yang menguntungkan pendapatan komoditi negara.

JAWAPAN

Yang Di-pertua,

1. Untuk makluman Ahli Yang Berhormat. industri nanas Malaysia merupakan antara industri di bawah sektor agromakanan yang memainkan peranan penting dalam pembangunan sosio ekonomi pengusaha tani negara. Pada tahun 2018, Malaysia tersenarai sebagai negara pengeluar nanas segar ke-23 terpenting dunia dan merupakan ke-5 terpenting di Asia Tenggara selepas Thailand, Filipina, Indonesia dan Vietnam.
2. Pengeluaran nanas negara pada tahun 2018 adalah sebanyak 382,811 tan metrik bernilai RM502 juta. Ia merupakan 27.7% daripada jumlah pengeluaran sektor buah-buahan di Malaysia. Pengeluaran nanas negara dijangka bertumbuh pada kadar 22.1% setahun dengan unjuran pengeluaran negara sebanyak 700,000 tan metrik pada tahun 2020. Eksport nanas negara pada tahun 2018 pula adalah bernilai RM342 juta, peningkatan sebanyak 39.18% berbanding tahun 2017.
3. Faktor penyumbang kepada peningkatan pengeluaran nanas negara adalah disebabkan oleh permintaan yang tinggi dari dalam dan luar negara serta tanaman nanas yang sesuai di tanam di semua kawasan di Malaysia kecuali kawasan berpaya dan lembah. Cara penjagaan tanaman yang mudah juga menyebabkan ramai petani berminat dengan tanaman nanas. Penglibatan pekebun kecil dan estet turut memainkan peranan penting dalam meningkatkan pertumbuhan pengeluaran nanas negara.
4. Kementerian Pertanian dan Industri Asas Tani melalui Lembaga Perindustrian Nanas Malaysia (LPNM) dalam Rancangan Malaysia Ke-11 (RMKe-11) telah memperkenalkan **Projek Integrasi Tanaman Nanas** sebagai salah satu pendekatan untuk pembangunan kawasan tanaman nanas dan juga **usaha memberi tambahan pendapatan** kepada **pengusaha tanaman komoditi seperti kelapa sawit dan getah**.

SOALAN NO : 2

5. Dalam tempoh pelaksanaan Projek Integrasi Tanaman Nanas yang telah bermula daripada tahun 2016 sehingga kini, seluas **777.0 hektar** kawasan telah dibangunkan dengan **tanaman nanas secara integrasi atau selingan bersama tanaman sawit dan getah**.
6. Berdasarkan data keluasan semasa, **53.0% kawasan tanaman integrasi** nanas di bawah program ini adalah ditanam secara **kontan dengan kelapa sawit** dan **35.0% ditanam bersama dengan tanaman getah** manakala baki 12.0% ditanam bersama tanaman dusun, buah-buahan dan kelapa.
7. Sejumlah **679 orang peserta telah menerima manfaat** melalui program ini. Secara **purata peserta** yang menyertai projek ini akan **menerima tambahan pendapatan** sebanyak **RM 2,500.00 – RM 3,500.00 sebulan** bergantung kepada keluasan tanaman dan juga jenis varieti nanas yang ditanam.
8. Melalui program ini, pekebun atau pengusaha tanaman komoditi seperti kelapa sawit dan getah akan dapat menikmati faedah tambahan pendapatan dari sumber pendapatan utama mereka terutama apabila berhadapan dengan suasana kejatuhan harga komoditi di pasaran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AWANG HUSAINI BIN SAHARI
[PUTATAN]**

TARIKH : 12 NOVEMBER 2019 (SELASA)

SOALAN NO. 3

Minta **MENTERI PENDIDIKAN** menyatakan pendirian Kementerian untuk memberikan autonomi kepada Kementerian Pelajaran dan Inovasi Negeri Sabah. Kerana ianya selaras dengan hasrat Kerajaan Negeri Sabah yang mahu kuasa autonomi dalam bidang pendidikan agar ianya dapat dikawal selia sendiri oleh pegawai-pegawai di dalam negeri Sabah.

JAWAPAN

Tuan Yang di-Pertua,

Kementerian Pendidikan Malaysia (KPM) akur dengan akta dan peraturan sedia ada yang sedang berkuatkuasa mengenai pemberian autonomi pendidikan kepada kerajaan negeri. Untuk makluman, Akta Pendidikan 1996 [Akta 550] telah memperuntukkan bahawa semua institusi pendidikan di bawah KPM adalah tertakluk kepada bidang kuasa Menteri Pendidikan. Akta 550 merupakan dokumen perundangan yang menjadi rujukan berhubung apa-apa perkara yang berkait dengan pendidikan di semua institusi pendidikan dalam Sistem Pendidikan Kebangsaan. Akta 550 ini juga telah mengkanunkan segala hasrat dan aspirasi negara yang ingin dicapai melalui pelaksanaan Dasar Pendidikan Kebangsaan yang berpaksikan Falsafah Pendidikan Kebangsaan.

Selain itu, Perkara 74 dan 80 Perlembagaan Persekutuan, turut menyatakan bahawa Kerajaan Persekutuan mempunyai kuasa perundangan dan kuasa eksekutif dalam perkara berkaitan pendidikan sebagaimana yang dinyatakan dalam perenggan 13 Senarai I (Senarai Persekutuan) Jadual Kesembilan Perlembagaan Persekutuan.

Justeru, sistem pendidikan yang dilaksanakan di Sabah adalah sama dengan dasar kerajaan pusat. Walau bagaimanapun, KPM bersedia untuk mempergiatkan lagi jalinan kerjasama yang tersedia ada antara KPM dengan kerajaan negeri Sabah bagi memastikan pendidikan di Negara ini berada dalam tahap yang terbaik.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATO' HJ CHE ABDULLAH B. MAT NAWI
(TUMPAT)**

TARIKH : 12 NOVEMBER 2019

SOALAN : 4

Dato' Haji Che Abdullah bin Mat Nawi [Tumpat] minta **MENTERI
DALAM NEGERI** menyatakan statistik penipuan sindiket MyKad sejak
2013.

JAWAPAN

Tuan Yang Di-Pertua,

Izinkan saya menjawab soalan ini secara bersekali dengan dua soalan lain yang turut membincangkan isu yang sama iaitu berkenaan dengan sindiket penipuan dokumen pengenalan diri oleh Yang Berhormat Kuala Kedah yang bertarikh 21 November 2019 dan Yang Berhormat Kapar yang bertarikh 3 Disember 2019.

Tuan Yang di-Pertua, berkenaan dengan operasi membanteras sindiket dokumen pengenalan diri palsu, berdasarkan rekod Jabatan Pendaftaran Negara dari tahun 2013 sehingga 30 September 2019, sebanyak 2,100 operasi penguatkuasaan terhadap sindiket penipuan dan pemilikan dokumen pengenalan diri palsu atau milik orang lain telah dijalankan. Daripada jumlah tersebut, seramai 1,047 tangkapan melibatkan orang awam telah dibuat dan telah didakwa di bawah Peraturan-peraturan Pendaftaran Negara 1990. Perbuatan penjualan dan pengeluaran dokumen pengenalan diri palsu ini telah dilakukan atas kapasiti individu-individu berkenaan untuk mengaut keuntungan mudah melalui cara yang salah.

SOALAN NO : 4

Justeru itu, kuasa penuh telah diberikan kepada Polis Diraja Malaysia untuk menyiasat dan mendakwa pihak yang didapati bersalah. Mengenai tangkapan individu yang menyalahgunakan dokumen pengenalan diri bagi kes penyalahgunaan dokumen pengenalan diri sama ada menggunakan kad pengenalan milik orang lain atau memiliki kad pengenalan palsu, berdasarkan rekod operasi yang dijalankan oleh Jabatan Pendaftaran Negara dalam tempoh tahun 2017 sehingga 30 September 2019, sebanyak 470 tangkapan telah dibuat. Kesemua individu kes-kes berkenaan telah dituduh di bawah peraturan 25(1)(e) Peraturan-peraturan Pendaftaran Negara 1990.

Bagi tempoh yang sama, perincian individu yang ditangkap mengikut pecahan lima negara asal tertinggi adalah seperti mana berikut:

- (i) Filipina – 323 orang;
- (ii) Indonesia – 106 orang;
- (iii) Malaysia – 15 orang;
- (iv) China – 9 orang; dan
- (v) Thailand – 5 orang.

Berhubung dengan penambahbaikan Jabatan Pendaftaran Negara, satu Jawatankuasa Penambahbaikan Sistem Penyampaian Jabatan Pendaftaran Negara yang dipengerusikan sendiri oleh Ketua Setiausaha Kementerian Dalam Negeri telah diedarkan pada 18 September 2019. Ini telah saya sebutkan sebelum ini pun dalam jawapan saya yang sebelum ini dan beberapa langkah penambahbaikan serta-merta dan strategi memperkemas sistem penyampaian JPN termasuk memperketatkan SOP sedia ada yang ada di Jabatan Pendaftaran Negara.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH : 12.11.2019 (SELASA)

SOALAN NO. 5

minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan adakah pihak Kementerian bercadang untuk memperkenalkan suatu medan jualan atas talian atau aplikasi mudah alih seperti Lazada atau Shopee yang memberi fokus hanya kepada produk-produk usahawan tempatan atau industri kecil dan sederhana bagi membantu dan menyokong produk tempatan serta memberi ruang produk tempatan menembusi pasaran antarabangsa dengan lebih sistematik.

JAWAPAN

Yang di-Pertua,

1. Kementerian tiada halangan bagi cadangan memperkenalkan *marketplace* baru khas kepada produk tempatan amnya serta Buatan Malaysia khususnya. Namun begitu isu keselamatan dan label pada produk yang digunakan serta dimakan perlu diberi keutamaan agar keselamatan pengguna dapat dijamin.

2. Kementerian turut menganjurkan misi perdagangan ke Luar Negara secara strategik bersama-sama pasar raya besar asing di Malaysia bagi memperkenalkan dan mempromosikan Kempen Beli Barangan Malaysia (KBBM) melalui Program (Malaysian Goes Global/Taste of Malaysia) khususnya di Sarajevo, Shanghai dan Dubai yang diyakini berupaya untuk merintis peluang pasaran kepada produk-produk tempatan yang berpotensi dan berkualiti untuk diketengahkan di pasaran antarabangsa.
3. Kementerian ini juga turut memanfaatkan kelebihan ekosistem ekonomi digital dan infrastruktur e-dagang di Negara ini melalui pelaksanaan pelbagai inisiatif kempen, promosi, diskaun jualan secara berterusan melalui portal online marketplace utama di Malaysia seperti Lazada, Shopee, Presto Mall dan marketplace lain yang mempunyai capaian trafik atas talian yang tinggi.
4. Kerjasama pihak kementerian dan Shopee contohnya telah mencatatkan peningkatan kenaikan tempahan sebanyak 132 peratus bagi barangan buatan Malaysia yang terdapat lebih kurang 3500 produk usahawan tempatan.
5. Selain itu, pihak Kementerian juga turut bekerjasama dengan syarikat penerbangan Air Asia untuk mempromosikan produk-produk tempatan di dalam pesawat Air Asia menerusi inflight menu, katalog dan juga marketplace Air Asia iaitu OURSHOP dan juga ROKKI.com.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : DATO' MASIR KUJAT [SRI AMAN]

TARIKH : 12 NOVEMBER 2019 (SELASA)

SOALAN NO. 6

Minta **MENTERI PENDIDIKAN** menyatakan bilakah pembaikan sekolah-sekolah daif di Parlimen Sri Aman akan bermula. Berapa buah sekolah rendah yang terlibat dan dikategorikan sebagai sekolah daif.

JAWAPAN

Tuan Yang di-Pertua,

Kementerian sentiasa komited dalam memastikan penyediaan infrastruktur yang kondusif bagi tujuan pengajaran dan pembelajaran tanpa mengira lokasi sekolah.

Di kawasan Parlimen Sri Aman khususnya, pelaksanaan naik taraf dan pembangunan semula sekolah daif melibatkan dua (2) buah sekolah daif iaitu SK Selepong dan SK Ng Skrang dengan kos projek berjumlah RM35.8 juta melalui peruntukan pembangunan dan *Private Finance Initiative (PFI)*. Status fizikal bagi kedua-dua sekolah tersebut adalah 100 peratus siap fizikal dengan melibatkan skop pembinaan bilik darjah, asrama, tandas dan bilik khas. Kedua-dua buah sekolah yang terlibat dalam pembangunan semula dan naik taraf ini adalah sekolah rendah yang dikategorikan sebagai sekolah daif.

Manakala, pelaksanaan pembangunan semula dan naik taraf sekolah daif yang diluluskan di dalam Belanjawan 2020 di Parlimen Sri Aman meliputi sebuah sekolah menengah dan sebuah sekolah rendah iaitu SMK Balai Ringin dan SK Melugu dengan anggaran kos projek berjumlah RM40 juta melalui peruntukan pembangunan. Skop pelaksanaan bagi projek ini merangkumi pembinaan bilik darjah, asrama, dewan makan, rumah guru dan bilik sains. Projek-projek ini dilaksanakan sepenuhnya oleh Jabatan Kerja Raya dan sedang dalam peringkat perolehan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KE DUA,
PARLIMEN KE EMPAT BELAS**

PERTANYAAN : JAWAB LISAN

DARIPADA : YB TUAN LIM LIP ENG (KEPONG)

TARIKH : 12 NOVEMBER 2019

SOALAN

TUAN LIM LIP ENG (KEPONG) minta **MENTERI DALAM NEGERI** menyatakan jumlah polis yang di tahan kerana positif dadah sejak pelantikan Tan Sri Abdul Hamid Bador sebagai Ketua Polis Negara. Adakah wajar mereka yang ditangkap tersebut masih berada di dalam perkhidmatan Polis Diraja Malaysia yang berperanan sebagai sebuah agensi penguatkuasaan undang-undang.

JAWAPAN

Terima kasih Tuan Yang di-Pertua. Daripada statistik Polis Diraja Malaysia, semenjak Tan Sri Dato' Seri Panglima Abdul Hamid bin Bador dilantik sebagai Ketua Polis Negara mulai 23 Mei 2019 iaitu lebih lima bulan yang lepas, seramai 252 orang pegawai dan anggota PDRM yang telah ditahan dan didapati positif di dalam pengambilan dadah.

PDRM sangat memandang serius mengenai masalah ini. Sehubungan dengan itu, manamana pegawai atau anggota yang didapati terlibat atau disabitkan dengan kesalahan dadah akan menghadapi tindakan tatatertib di bawah Peraturan-peraturan Pegawai Awam (Kelakuan & Tatatertib) 1993 yang boleh dikenakan hukuman daripada amaran sehinggalah buang kerja. Sekiranya dia disabitkan kesalahan di mahkamah, pegawai atau anggota boleh dikenakan tindakan di bawah Peraturan 33, Peraturan-peraturan Pegawai Awam (Kelakuan &

SOALAN NO : 7

Tatatertib) 1993 yang mana boleh dikenakan hukuman sehingga buang kerja. Selain daripada itu, tindakan-tindakan tatatertib di bawah Peraturan 37, peraturan yang sama di bawah kesalahan-kesalahan yang boleh dikenakan hukuman sehingga turun pangkat dan buang kerja.

Di samping itu, pihak Jabatan Integriti dan Pematuhan Standard (JIPS) juga mengambil tindakan di bawah Peraturan 7, Peraturan-peraturan Pegawai Awam (Kelakuan & Tatatertib) 1993, di mana pegawai penyiasat tatatertib akan membawa pegawai atau anggota terlibat berjumpa dengan pegawai perubatan untuk mengambil sampel darah atau air kencing sebagai pengesahan kedua jika laporan patologi didapati negatif.

JIPS juga telah melaksanakan Program MYPS Indah bagi program pemulihan yang dianjurkan oleh bahagian agama dan kaunseling, khusus kepada warga PDRM yang terlibat dengan penyalahgunaan dadah bagi kes-kes yang tidak dituduh di mahkamah kerana laporan ujian air kencing daripada patologi didapati negatif.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SARAVANAN A/L MURUGAN
[TAPAH]**

TARIKH : 12 NOVEMBER 2019 (SELASA)

SOALAN NO. 8

DATUK SERI SARAVANAN A/L MURUGAN [TAPAH] minta **MENTERI PENDIDIKAN** melaporkan keputusan Jawatankuasa Pemerkasaan TVET yang diharapkan dapat memberi impak positif dalam menangani isu pertindihan sistem pendidikan, pensijilan, kekangan dana pembangunan serta ketidaktentuan nasib graduan Latihan Teknikal dan Vokasional Malaysia (TVET).

JAWAPAN

Tuan Yang di-Pertua,

Untuk makluman Ahli Yang Berhormat, status terkini Jawatankuasa Pemerkasaan Pendidikan dan Latihan Teknikal dan Vokasional Malaysia (JKPTVET) adalah seperti berikut:

1. Pihak kementerian telah mengambil inisiatif menubuhkan Jawatankuasa Pemerkasaan TVET pada 21 Jun 2018 bertujuan menyediakan satu laporan bagi menangani isu-isu pemerkasaan TVET merentas kementerian. Justeru, satu laporan Jawatankuasa Pemerkasaan TVET telah disediakan dan telah dikemukakan kepada YB Menteri Pendidikan pada 31 Julai 2019 hasil daripada input dan maklumbalas pemegang taruh (industri, ibu bapa, penyedia TVET Awam, kementerian/agensi berkaitan TVET) semasa Sesi Town Hall di 6 zon.

Laporan ini berfokus kepada kepada lima pemacu utama dalam memartabatkan pembangunan TVET dalam arus perdana. Penyelarasan dan rasionalisasi tersebut merangkumi tadbir urus terselaras, program berkualiti tinggi, TVET dipacu industri, pembiayaan yang mampan dan pilihan utama (*preferred choice*) yang memberikan kesan yang signifikan kepada prestasi ekonomi negara dan perkembangan TVET pada masa hadapan.

2. Menyedari kepentingan TVET kepada pembangunan negara dan keperluan satu usaha bersepadu dilakukan maka Mesyuarat Jemaah Menteri yang bersidang pada 14 Ogos 2019 telah memberi mandat penubuhan **Jawatankuasa Kabinet Pemerkasaan TVET (JKKPTVET)** untuk memperkasa sistem dan institusi TVET merentasi sembilan kementerian. Tujuan JKKPTVET berperanan sebagai badan penasihat kepada kerajaan dalam hal-hal berkaitan pembangunan aliran TVET negara. Walau bagaimanapun, Mesyuarat Susulan Jemaah Menteri, berpandangan bahawa Jawatankuasa Kabinet Pemerkasaan TVET merupakan permulaan kepada penubuhan satu badan penyelaras bagi semua kementerian.

3. Mesyuarat Jawatankuasa Kabinet Pemerkasaan TVET telah bersidang untuk kali pertama pada 23 Ogos 2019 telah memperakukan beberapa syor yang dicadangkan dalam Laporan Jawatankuasa Permerkasaan TVET, antaranya:

- a. Penubuhan Badan Penyelaras TVET Negara
- b. Model Pembiayaan yang mampan
- c. Model Pemilikan Bersama dengan industry
- d. Perkasaan Persijilan TVET (Industri)
- e. Penjenamaan TVET Kebangsaan Tunggal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 12.11.2019 (SELASA)

SOALAN NO. 9

minta **MENTERI PERDAGANGAN DALAM NEGERI DAN HAL EHWAL
PENGGUNA** menyatakan kos-kos subsidi terhadap barang- barang
kawalan, sama ada kos-kos subsidi ini dapat ditampung Kerajaan, serta
usaha Kerajaan untuk mengatasi ketirisan subsidi barangan pengguna.

JAWAPAN

Tuan Yang Di-Pertua,

Barang - barang kawalan di bawah kawal seliaan kementerian di mana kerajaan ada memperuntukkan subsidi adalah seperti **Ron95, Diesel, Tepung Gandum Kegunaan Am, Minyak Masak Dan Gas Petroleum Cecair (LPG).**

Bagi tahun 2019, Kerajaan telah memperuntukkan bajet bagi membiayai subsidi ke atas **tiga (3)** barang kawalan iaitu tepung gandum kegunaan am berjumlah RM40 juta, minyak masak RM600 juta dan sehingga Ogos 2019 gas petroleum cecair (LPG) sebanyak RM1.1 juta.

Kos - kos subsidi ini jika diambil kira memang merupakan sesuatu yang **(unsustainable) dengan izin** untuk jangka masa yang panjang. Sebagai contoh bagi Ron95, harga pasarannya pada masa kini adalah **RM 2.27** seliter. Demi membolehkan stesen minyak menjual Ron95 pada harga siling RM2.08 seliter, kerajaan terpaksa menampung **RM 0.19 seliter**, atau **RM 64.91 juta seminggu** dan ini merupakan sistem subsidi secara pukal. Di bawah sistem ini, kerajaan telah membelanjakan sejumlah lebih kurang RM 2.7 Billion bagi subsidi Ron95 pada tahun 2018.

Apa yang jelas adalah subsidi petrol secara pukal ini selain daripada membantu golongan berpendapatan rendah (B40) membeli petrol pada harga yang berpatutan tetapi ia juga menyebabkan golongan berpendapatan tinggi (T20) menikmati lebih banyak subsidi petrol kerana mereka mempunyai kemampuan perbelanjaan yang lebih tinggi. Selain daripada itu sebagai contoh, warganegara Malaysia dan mereka yang bukan berwarganegara Malaysia juga secara langsung menikmati subsidi petrol daripada pihak kerajaan. Selain daripada itu negeri-negeri yang bersempadan dengan negara jiran seperti Johor, Perlis, Kelantan dan Kedah juga mendapati bahawa pemilik kenderaan dari luar ikut mengisi petrol bersubsidi ini dan mereka juga menikmati harga rendah. Ini merupakan suatu yang tidak saksama dan adil serta merupakan salah satu punca ketirisan berlaku.

Oleh yang demikian, selain daripada Sarawak, Sabah dan Wilayah Persekutuan Labuan, Kerajaan akan menggantikan sistem subsidi secara pukal itu dengan program yang dinamakan Program Subsidi Petrol iaitu pemberian subsidi Ron95 secara bersasar supaya hanya mereka yang layak, iaitu dikategorikan sebagai B40 dan M40 sahaja yang menerima subsidi.

Selain daripada itu, secara amnya, bagi mengatasi ketirisan subsidi untuk barangan kawalan lain, pelbagai usaha telah dilaksanakan oleh Kerajaan dengan memperkemaskan mekanisme pemberian subsidi, pelaksanaan operasi, penangkapan, siasatan dan operasi yang menyeluruh. Setakat ini Kementerian telah melaksanakan usaha seperti berikut:

- (a) taklimat bersepadu;
- (b) pemeriksaan menyeluruh terhadap rantai pengedaran barang kawalan bersubsidi;
- (c) kaedah baru kawalan antara negeri;
- (d) memperkukuhkan strategi risikan; dan
- (e) tindakan membekukan kuota.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB ARTHUR JOSEPH KURUP (PENSIANGAN)

TARIKH : 12 NOVEMBER 2019

SOALAN

TUAN ARTHUR JOSEPH KURUP [PENSIANGAN] minta **MENTERI DALAM NEGERI** menyatakan apakah cadangan untuk menaik taraf Pusat Kastam, Immigresen dan Kuarantin (CIQ) di daerah Pensiangan dan Pagalungan dengan sempadan Kalimantan, Indonesia.

JAWAPAN

Tuan Yang Di Pertua,

Pada ketika ini, hanya terdapat dua (2) pos kawalan sempadan iaitu di Pagalungan dan Pensiangan dan ianya bukan bertaraf CIQ. Ini kerana penggunaan di pos-pos kawalan tersebut adalah rendah pada masa ini.

Walau bagaimanapun, Kerajaan Persekutuan, Kerajaan Negeri Sabah dan Indonesia telah mengadakan perbincangan untuk mengenal pasti lokasi yang bersesuaian untuk diwujudkan satu CIQ di antara sempadan Negeri Sabah dan Kalimantan Timur.

Manakala, bagi sebarang keperluan menaik taraf pos kawalan-pos kawalan sedia ada hanya akan ditentukan dari masa ke semasa sekiranya terdapat keperluan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 12 NOVEMBER 2019 (SELASA)

SOALAN NO. 11

Minta **MENTERI PERTANIAN DAN INDUSTRI ASAS TANI** menyatakan adakah Kementerian membuat kajian sama ada tanah dan iklim di Sarawak sesuai untuk penanaman durian Musang King.

JAWAPAN

Yang di-Pertua,

1. Untuk makluman Ahli Yang Berhormat, pokok durian termasuk varieti Musang King sesuai ditanam di atas pelbagai jenis tanah dan jenis tanah lom liat berpasir. Jenis tanah sedemikian sangat sesuai untuk pertumbuhan dan penghasilan buah yang berkualiti kerana mempunyai saliran yang baik. Sistem saliran yang tidak sempurna hendaklah dielakkan kerana akar durian sangat sensitif terhadap air yang bertakung. Ia akan menggalakkan serangan penyakit akar dan batang. Tanah yang mempunyai pH 5.5 hingga 6.5 dan kawasan yang cerun landai dan rata juga baik untuk penanaman durian dengan kecerunan tanah antara 0-25 darjah. Kecerunan melebihi 25 - 30 darjah perlu mengikut panduan pengurusan tanah bercerun.

2. Secara umumnya penanaman durian di Sarawak adalah di kawasan tanah jenis lom dan buat masa ini Jabatan Pertanian Sarawak sedang membuat kajian khusus untuk mengkaji prestasi pertumbuhan durian varieti Musang King di Sarawak.

3. Sehubungan itu, selaras dengan usaha untuk membantu petani di negeri Sarawak bagi menjadikan tanaman Durian Musang King sebagai tanaman komersial yang boleh menjana pendapatan lumayan, Jabatan Pertanian Sarawak telah mewujudkan empat plot kajian di Stesen dan Pusat Latihan Pertanian pada tahun 2019. Plot-plot kajian ini terletak di Stesen Penyelidikan Semongok (Kuching), Stesen Penyelidikan Kabuloh (Miri), Stesen Pertanian Bersepadu Layar (Betong) dan Pusat Latihan Pertanian Sg. Sebieu (Bintulu) bagi tujuan pemerhatian dan mengumpul data prestasi pertumbuhan durian varieti Musang King.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. ADHAM BIN BABA
[TENGGARA]**

TARIKH : 12 NOVEMBER 2019 (SELASA)

SOALAN NO. 12

Minta **MENTERI PENDIDIKAN** menyatakan adakah guru-guru di negara ini sudah mengubah kaedah pengajaran '*Teacher Centered Learning*' kepada '*Student Centered Learning*' ke seluruh negara dan adakah teknologi pembelajaran menjadi domain untuk diperkenalkan.

JAWAPAN

Tuan Yang di-Pertua,

Kementerian Pendidikan Malaysia (KPM) ingin memaklumkan bahawa kaedah pengajaran yang berpusatkan murid telah lama dilaksanakan oleh guru-guru di sekolah. Pelaksanaan kaedah tersebut diperkuatkan lagi dengan pelaksanaan Kurikulum Standard Sekolah Menengah (KSSM) dan semakan Kurikulum Standard Sekolah Rendah (KSSR) pada tahun 2017, yang mana pembinaannya adalah bagi mengimbangi set ilmu pengetahuan dan kemahiran seperti pemikiran kreatif, inovasi, penyelesaian masalah, dan kepimpinan. Kurikulum ini memberi penekanan kepada pengajaran dan pembelajaran yang berpusatkan murid dan pengajaran yang dibezakan yang telah dilaksanakan di sekolah.

Kurikulum tersebut turut memberi lebih penekanan kepada penyelesaian masalah, tugas berasaskan projek, memperkemas mata pelajaran atau tema, dan melaksanakan pentaksiran formatif. Pelaksanaan Konsep Pembelajaran Pendidikan Abad Ke-21 (PAK-21)

turut menjadi pemangkin kepada pembelajaran yang berpusatkan murid. Tumpuan guru kepada *Student Centered Learning* dapat dipertingkatkan lagi dengan pemansuhan peperiksaan bagi murid Tahap 1 sekolah rendah bermula tahun 2019.

Bagi tujuan tersebut, KPM telah merancang latihan dalam perkhidmatan yang berterusan bagi memastikan pedagogi, kemahiran dan kompetensi guru berada pada tahap yang tinggi serta berkemampuan memberi pengajaran dan bimbingan kepada murid yang mempunyai perbezaan kebolehan dalam sesuatu bilik darjah.

Berkaitan dengan teknologi sebagai domain pembelajaran berpusatkan murid, usaha kerajaan telah dimulakan sejak tahun 1999 melalui konsep Sekolah Bestari yang dirancang berdasarkan fokus terhadap pelaksanaan pengajaran dan pembelajaran (PdP) yang kreatif, berkualiti dan berkesan. Teknologi dilihat sebagai pengupaya dan menjadi prinsip utama dalam memastikan kejayaan pembestarian sekolah dari segi pencapaian pelaksanaan berdasarkan Laporan Smart School Qualification Standards (SSQS) 2018, sebanyak 98 peratus sekolah telah mencapai tahap Bestari minimum 3 Bintang. Melalui inisiatif ini, institusi pembelajaran direka semula secara sistemik dari segi amalan PdP yang berpusatkan murid serta pengurusan dan pentadbiran sekolah (PdT) bagi menyediakan murid untuk menghadapi cabaran zaman teknologi maklumat.

Terkini, bagi meningkatkan pembelajaran berpusatkan murid dengan menggunakan teknologi sebagai pengupaya, KPM telah membina satu pelantar pendidikan digital di *portal.moe-dl.edu.my* yang membolehkan perubahan kaedah pengajaran dan pembelajaran berkesan berlaku secara *synchronous* (bersemuka) dan *asynchronous* (secara dalam talian melalui konsep pembelajaran di mana-mana pada bila-bila masa. Pelantar pembelajaran ini mengandungi pelbagai jenis kandungan pembelajaran termasuk buku teks digital yang membolehkan guru melaksanakan kaedah pembelajaran yang lebih menumpukan kepada murid untuk belajar secara sendiri serta menerapkan kemahiran yang sesuai dengan pembelajaran sepanjang hayat. Usaha ini disokong oleh inisiatif perkhidmatan internet yang dibekalkan oleh KPM di sekolah-sekolah. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB PUAN VIVIAN WONG SHIR YEE (SANDAKAN)

TARIKH : 12 NOVEMBER 2019

SOALAN

PUAN VIVIAN WONG SHIR YEE [SANDAKAN] minta **MENTERI DALAM NEGERI** menyatakan :-

(a) apakah langkah yang akan dilaksanakan oleh Kerajaan untuk memastikan Pas Sementara Sabah yang akan dikeluarkan bermula Jun 2020 tidak disalahgunakan; dan

(b) adakah sistem dan pegawai bersedia untuk mendaftar semula 600 ribu orang di Sabah yang dijangka layak memohon PSS.

JAWAPAN

Tuan Yang Di Pertua,

Pelaksanaan Pas Sementara Sabah (PSS) adalah bertujuan untuk menyeragamkan kepelbagaian dokumen yang dimiliki oleh warga asing atau *displaced person* di Sabah iaitu pemegang dokumen IMM13 yang dikeluarkan oleh Jabatan Imigresen Malaysia, Kad Burung-Burung yang dikeluarkan oleh Jabatan Ketua Menteri Sabah dan Sijil Banci yang dikeluarkan oleh Pasukan Petugas Khas Persekutuan Sabah, Majlis Keselamatan Negara Sabah. Keseragaman dokumen ini dilakukan bagi memudahkan pengecaman dan operasi oleh pihak penguatkuasa.

PSS hanya akan dikeluarkan kepada pemegang dokumen sedia ada yang telah disahkan oleh agensi pengeluar yang berkaitan. Selain itu, semakan silang data antara agensi juga dilaksanakan bagi memastikan pemegangnya adalah tulen sebelum PSS dikeluarkan.

Untuk makluman Ahli Yang Berhormat, PSS yang akan dikeluarkan adalah dalam bentuk kad yang mempunyai ciri-ciri keselamatan seperti biometrik dan mempunyai nombor ID yang unik yang membezakan PSS dengan pas-pas imigresen sedia ada. PSS juga adalah sebagai mekanisme kawalan keberadaan dan pergerakan warga asing di Sabah.

Satu jawatankuasa khas akan ditubuhkan di peringkat Negeri Sabah yang terdiri daripada pelbagai agensi seperti Jabatan Imigresen Malaysia, Majlis Keselamatan Negara Negeri Sabah, Jabatan Pendaftaran Negara Negeri Sabah dan Jabatan Ketua Menteri Sabah bagi memperincikan mekanisme pelaksanaan PSS ini seterusnya memastikan kelancaran operasi.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGKAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 12 NOVEMBER 2019 (SELASA)

SOALAN NO. 14

Minta **MENTERI PENDIDIKAN** menyatakan apakah usaha yang dilakukan Kementerian bagi membantu Institut Pendidikan Tinggi Awam (IPTA) mencari sumber kewangan dan peruntukan sendiri agar tidak terlalu bergantung kepada dana dari Kerajaan kerana akhirnya pelajar yang akan menanggung beban kerana pihak IPTA terpaksa menaikkan yuran kursus.

JAWAPAN

Tuan Yang di-Pertua,

Untuk makluman Ahli Yang Berhormat, universiti awam (UA) merupakan sebuah Badan Berkanun Persekutuan yang dibiayai oleh kerajaan melalui penyaluran geran. Namun begitu, pembiayaan ini tidaklah secara menyeluruh di mana UA masih perlu menjana pendapatan secara dalaman bagi menampung keperluan kos operasi di UA masing-masing. KPM selaku kementerian pengawal, sentiasa menggalakkan UA menjana pendapatan sendiri melalui langkah-langkah seperti berikut:

- Menggiatkan lagi usaha menambah pendapatan dalaman dengan mempelbagaikan sumber pendapatan sedia ada seperti pelaburan, perniagaan, geran penyelidikan, serta memperkukuhkan tabung wakaf dan *endowmen*.

- Mengoptimumkan kepakaran sedia ada daripada sumber manusia masing-masing dan aset bagi menjana pendapatan dalaman UA;
- Mengukuhkan lagi kedudukan anak syarikat di bawah UA supaya sumber pendapatan daripada anak syarikat dapat membantu UA dalam membiayai sebahagian perbelanjaannya;
- Mengoptimumkan kos dalam pendidikan tinggi melalui perbelanjaan secara berhemah dan cekap tanpa mengurangkan atau menjejaskan penyampaian kualiti pendidikan tinggi kepada masyarakat. Selain itu, UA turut melaksanakan pengurusan fasiliti yang cekap dan efisien melalui penggunaan utiliti (elektrik dan air), dan meningkatkan produktiviti dan keberkesanan kos pendidikan tinggi di mana UA perlu mengeluarkan lebih *outcome* menggunakan sumber sedia ada atau sumber yang terhad.
- KPM juga menetapkan sasaran penjanaan kepada UA dan KPI tersebut dipantau terus oleh YB Menteri Pendidikan

Selain itu, Kementerian masih meneruskan pemberian geran penyelidikan (Fundamental Grant Research Scheme) kepada Universiti Awam (UA) yang dilihat mampu melahirkan lebih ramai pemegang Ph.D warganegara Malaysia secara bersasar yang berkualiti dan dapat memenuhi ekspektasi Graduate on Time (GoT) daripada pemberian tajaan Biasiswa secara langsung. Ini kerana, melalui aktiviti penyelidikan, pelajar Ph.D akan diselia dengan ketat oleh pihak UA di samping melibatkan diri dalam penghasilan penemuan-penemuan baru daripada aktiviti penyelidikan di UA untuk manfaat negara. Dana skim ini untuk tahun 2018 adalah sejumlah RM200 juta manakala untuk tahun 2019 pula ditambahkan sebanyak RM75.35 juta menjadikannya RM275.35 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. HAJI NOOR AZMI BIN GHAZALI
[BAGAN SERAI]**

TARIKH : 12 NOVEMBER 2019

SOALAN

Minta **MENTERI PERTANIAN DAN INDUSTRI ASAS TANI** menyatakan apakah Kementerian bersedia untuk mewujudkan pemindahan air dari hulu Sungai Perak ke Tasek Bukit Merah demi membantu pengairan sawah padi di daerah Kerian khususnya Parlimen Bagan Serai yang natijahnya dijangka akan meningkatkan hasil padi, justeru meningkatkan pendapatan pesawah-pesawah dari jelapang padi negara ini.

JAWAPAN

Tuan Yang di-Pertua,

1. Untuk makluman Ahli Yang Berhormat, sebanyak RM1.395 billion telah diperuntukkan untuk tujuan pengukuhan infrastruktur pengairan dan saliran bagi Kawasan Pembangunan Pertanian Bersepadu (IADA) di mana di bawah RMKe11 untuk meningkatkan produktiviti padi termasuk di kawasan IADA Kerian. Kawasan Bagan Serai mempunyai keluasan bertanam padi sebanyak 5,285.52 hektar dengan jumlah pesawah 2,451 orang.
2. Program *National Water Balance Management System (NAWABS)* Fasa 1 (2016 – 2020) dan Fasa 2 (2019 – 2022) yang dilaksanakan oleh Kerajaan melalui Jabatan Pengairan Dan Saliran (JPS) akan menyediakan satu sistem maklumat yang mampu membuat ramalan dan amaran kemarau sumber air lebih awal iaitu ramalan 2 bulan dan amaran 14 hari ke hadapan.
3. Program ini sedang diperluaskan ke seluruh lembangan sungai di Malaysia termasuk di Sungai Perak, Sungai Kerian dan Sungai Kurau. Ketiga-tiga lembangan sungai di Negeri Perak ini akan dilaksanakan dalam NAWABS Fasa 2. Objektif program ini adalah membantu pihak Pengurusan Sumber Air Negeri dalam menyediakan ketersediaan maklumat sumber air. Kajian ini antaranya juga akan mengkaji kecukupan sumber air serta mengenalpasti potensi serta kesesuaian pemindahan air dari satu lembangan sungai ke lembangan sungai yang lain (*inter-basin transfer*).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB PUAN SITI ZAILAH BT. MOHD YUSOFF
(RANTAU PANJANG)**

TARIKH : 12 NOVEMBER 2019

SOALAN

PUAN HAJAH SITI ZAILAH BINTI MOHD YUSOFF [RANTAU PANJANG] minta **MENTERI DALAM NEGERI** menyatakan bilakah projek menaik taraf Kompleks Imigresen, Kastam, Kuarantin dan Keselamatan (ICQS) Rantau Panjang akan dilaksanakan.

JAWAPAN

Tuan Yang Di Pertua,

Kementerian Dalam Negeri (KDN) telah mengemukakan permohonan peruntukan bagi melaksanakan projek Naiktaraf Kompleks ICQS Rantau Panjang tersebut kepada Kementerian Hal Ehwal Ekonomi (MEA) pada 9 April 2017 bagi kelulusan di bawah *Rolling Plan* 3 RMK-11.

Walau bagaimanapun , permohonan tersebut belum diberi pertimbangan kerana projek ini masih di peringkat penyelarasan rekabentuk konsep dengan pihak Thailand disebabkan cadangan pembinaan jambatan baharu di Pengkalan Kubor dan pembesaran jambatan Sungai Golok di Rantau Panjang turut melibatkan kawasan Thailand. Kerajaan, melalui MEA sedang menyelaraskan perkara-perkara dasar dan teknikal berkaitan perancangan projek ini dengan pihak Thailand sebelum pertimbangan untuk kelulusan RMK-12.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH BIN MOHD.
NASIR [JOHOR BAHRU]**

TARIKH : 12 NOVEMBER 2019 (SELASA)

SOALAN NO. 14

Minta **MENTERI PENDIDIKAN** menyatakan inisiatif-inisiatif yang telah dijalankan khususnya di peringkat sekolah dan universiti bagi menggalakkan penglibatan golongan belia dan anak muda dalam dunia keusahawanan Industri 4.0.

JAWAPAN

Tuan Yang di-Pertua,

Kementerian Pendidikan Malaysia (KPM) sedar akan tahap kualiti yang perlu ada dalam setiap murid dan salah satu dimensi yang dititikberatkan adalah aspek keusahawanan. Menyedari akan hakikat tersebut, di peringkat sekolah, KPM telah memperkenalkan mata pelajaran Pengajian Keusahawanan sebagai mata pelajaran elektif bagi murid Tingkatan 4 dan 5 di sekolah menengah teknik. Antara tajuk yang dimasukkan dalam mata pelajaran ini ialah Keusahawanan Digital yang menjurus kepada keusahawanan industri 4.0. Tajuk ini memberi pendedahan kepada murid berkaitan perisian aplikasi, keusahawanan digital dan perundangan serta mengaplikasikan platform teknologi digital dalam pemasaran.

Selain itu, pembangunan Kurikulum Standard Kolej Vokasional turut mengambil kira keperluan Revolusi Industri 4.0. Elemen inovasi dan kreativiti diberi keutamaan dalam penyampaian kurikulum di kolej vokasional. Aspek inovasi dan kreativiti ditonjolkan dalam projek-projek inovasi yang dilaksanakan di kolej vokasional. Sebagai contoh, pelaksanaan *Smart classroom*, projek terbaharu kolej vokasional pertanian adalah melaksanakan *Smart Agriculture* bersama pemain industri. Melalui projek ini, usaha untuk melahirkan peladang yang berkemahiran, berteknologi tinggi dan usahawan tani yang berjaya di kalangan anak muda dapat dipercepatkan menggunakan kemudahan dan kepakaran daripada pemain industri.

Pelibatan golongan belia dan anak muda dalam dunia keusahawanan diperkuatkan lagi dengan pelaksanaan Program Industri Menengah Atas (PIMA) yang turut mendapat sokongan daripada pemain industri.

Di peringkat institusi pendidikan tinggi (IPT), kursus keusahawanan telah diwajibkan di semua universiti awam (UA) bermula tahun 2007 bagi memastikan semua pelajar tidak mengira bidang pengajian didedahkan kepada ilmu keusahawanan. UA boleh menawarkan Kursus Keusahawanan sebagai Kursus Teras Universiti / Program atau melalui

Kelompok U2 dalam subjek Mata Pelajaran Pengajian Umum (MPU). Penekanan terhadap bidang keusahawanan dijadikan salah satu fokus dalam Lonjakan 1 Pelan Pembangunan Pendidikan Malaysia (Pendidikan Tinggi) 2015-2025 iaitu untuk melahirkan graduan yang holistik, keusahawanan dan seimbang.

Program keusahawanan di bawah inisiatif ini, dilaksanakan melalui tiga (3) fasa iaitu membudaya (*enculture*), mengukuh (*empower*) dan melengkapi (*equip*) yang melatih pelajar untuk menguruskan sumber dan kewangan serta berkomunikasi dengan baik, berdaya tahan, mempunyai locus kawalan diri (*internal locus control*), berupaya menguruskan risiko dan yakin dengan keupayaan diri.

Kerjasama strategik dengan industri dan agensi pembangunan keusahawanan seperti Agensi Kaunseling & Pengurusan Kredit (AKPK), SME Corporation Malaysia (SME Corp. Malaysia), Malaysian Technology Development Corporation (MTDC) dan CELCOM turut diperkukuhkan dalam memastikan pelajar yang mempunyai kecenderungan keusahawanan mendapat bimbingan sewajarnya untuk memula, membangunkan dan melengkapkan perniagaan mereka khususnya dalam bidang-bidang terkini selaras dengan keperluan industri 4.0 seperti *eCommerce*, *FinTech*, logistik, *big data*, *robotic engineering* dan *Internet of Things*.

KPM telah menerbitkan Modul Baharu Kursus Asas Keusahawanan Institut Pendidikan Tinggi untuk dijadikan rujukan utama pengajaran bagi Kursus Keusahawanan di semua UA bermula sidang akademik 2017/2018. UA juga boleh menyesuaikan modul ini mengikut program akademik tertentu. Di samping itu, KPM juga telah berkerjasama dengan UA dan Malaysia Digital Economy Corporation (MDEC) juga telah membangunkan modul-modul kursus baharu contohnya Keusahawanan Digital, Kanvas Model Perniagaan, Teknoprenur bagi memperkasakan lagi pelajar dengan ilmu keusahawanan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATO' SRI ISMAIL SABRI BIN YAAKOB
(BERA)**

TARIKH : 12 NOVEMBER 2019

SOALAN

DATO' SRI ISMAIL SABRI BIN YAAKOB [BERA] minta **MENTERI DALAM NEGERI** menyatakan apakah Kerajaan memantau kedatangan mubaligh serta pendakwah agama lain dari luar negara dan adakah pihak Kerajaan memantau isi kandungan dakwah mereka.

JAWAPAN

Tuan Yang Di Pertua,

Kemudahan Pas Lawatan (Ikhtisas) dikeluarkan oleh Jabatan Imigresen Malaysia (JIM) selaras dengan peruntukan di bawah Peraturan 8(1) Peraturan–Peraturan Imigresen 1963 yang memberi hak kepada seseorang untuk memasuki dan berada secara sementara di dalam Persekutuan atau Sabah atau Sarawak. Pas Lawatan tersebut terbahagi kepada dua kategori iaitu :

- (i) Kategori Pakar – dikeluarkan kepada warganegara asing di bawah kategori pakar dan teknikal untuk menjalankan kerja-kerja khusus dalam tempoh yang singkat.
- (ii) Kategori Mubaligh – dikeluarkan kepada warganegara asing bertaraf mubaligh keagamaan dan terbahagi kepada dua kategori

iaitu Mubaligh Agama Islam dan Mubaligh Agama selain Islam (Kristian, Hindu, Buddha dan lain-lain).

Tempoh maksimum pas berkenaan adalah 12 bulan bagi setiap pengeluaran dan boleh dilanjutkan sehingga tempoh maksimum 36 bulan. Sebagai elemen kawalan, antara syarat utama untuk memohon Pas Lawatan (Ikhtisas) bagi Mubaligh Agama Islam dan Mubaligh lain-lain agama ialah perlulah mendapatkan surat sokongan daripada badan-badan yang dikenalpasti. Pelantikan badan pengesah/penyokong berkenaan adalah bagi memastikan pengamal agama asing yang dibawa masuk menjalankan aktiviti yang sah di Malaysia selaras dengan syarat Pas Lawatan (Ikhtisas).

Badan pengesah/penyokong yang dimaksudkan adalah seperti berikut:

- (i) Jabatan Agama Islam negeri dan Jabatan Kemajuan Islam Malaysia (JAKIM) bagi Mubaligh Agama Islam; dan
- (ii) Malaysia Hindu Sangam, Malaysia Buddhist Society, Malaysia Youth Buddhist Society, Majlis Gurdwara Malaysia untuk Mubaligh selain Islam.

Bagi Mubaligh lain-lain agama semua permohonan akan dibentangkan dalam Mesyuarat Jawatankuasa Khas Pas Lawatan (Ikhtisas) Kategori Mubaligh Lain-lain Agama yang dipengerusikan oleh Ketua Pengarah Imigresen. Mesyuarat ini dianggotai oleh Kementerian Dalam Negeri (KDN), Polis DiRaja Malaysia (PDRM) dan JIM.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : PUAN NOR AZRINA BINTI SURIP
[MERBOK]**

TARIKH : 12 NOVEMBER 2019 (SELASA)

SOALAN

Minta **MENTERI PERTANIAN DAN INDUSTRI ASAS TANI** menyatakan secara terperinci usaha Kementerian untuk memperkenalkan dasar baharu program pertanian pintar dengan peruntukan pembiayaan disediakan kepada golongan pekebun dan petani.

JAWAPAN

Tuan Yang Dipertua,

1. Kementerian ini sememangnya memberi perhatian terhadap perubahan landskap dalam sektor pertanian, iaitu daripada pertanian tradisional kepada pertanian pintar atau pertanian moden. Pelaksanaan pertanian pintar ini mempunyai potensi yang besar dalam membantu mengembangkan sektor pertanian seterusnya dapat memacu ekonomi negara.
2. Usaha mewujudkan pertanian pintar atau pertanian moden akan turut dirangkumi di bawah Dasar Agromakanan Negara (DAN) (2011-2020) dan DAN 2.0 (2021-2030) yang sedang dirangka. Salah satu agenda utama dalam menyediakan DAN 2.0 adalah mengambilkira pembangunan infrastruktur dan penggunaan teknologi moden (agroteknologi).
3. Sejar dengan perkembangan teknologi dan Revolusi Industri 4.0, program pertanian pintar akan terus diberi penekanan dan disusun semula yang merangkumi penyebaran penggunaan teknologi pertanian (mekanisasi dan automasi), pembangunan model pertanian

moden dan pembangunan pangkalan Data Agromakanan Negara (*Agriculture Flagship*).

4. Antara usaha Kementerian untuk memperkenalkan dasar baharu program pertanian pintar ialah dengan memberi penekanan terhadap penggunaan aplikasi teknologi dalam sektor pertanian seperti berikut:

(i) **Pengintegrasian teknologi pertanian moden yang bersifat *hi-tech*** seperti penggunaan robot (agro robotik), penderia, pertanian tepat, penggunaan dron, pembangunan data pertanian (*big analytical data*), aplikasi berasaskan *Internet of Things* (IoT), model kilang tanaman dan lain-lain;

(ii) **Penglibatan lebih banyak pihak dari sektor swasta dan pihak industri** bagi membantu golongan petani dalam mempercepatkan pemindahan teknologi moden;

(iii) **Penambahbaikan modul dan model pembelajaran pertanian pintar** yang dirangka dan disediakan bagi melahirkan dan menyediakan golongan belia tani masa depan (*future agro youth*);

(iv) **Peluasan skop kursus dan latihan berkaitan teknologi moden;**

(v) **Pemberian bantuan berbentuk insentif** yang bersesuaian kepada para petani seperti pemberian input pertanian, pembangunan infrastruktur ladang dan sebagainya;

(vi) **Penggalakkan dan pemantapan program penyelidikan di institusi-institusi penyelidikan** bagi membangunkan varieti-varieti baru tanaman yang lebih tahan rintangan (*resistance*) kepada kesan perubahan iklim sama ada melalui kaedah konvensional mahupun melalui kaedah bioteknologi; dan

(vii) **Pemeriksaan inovasi dalam penggunaan teknologi** dalam menggiatkan lagi sektor pertanian yang kalis masa depan serta menjamin sekuriti makanan negara.

5. Keprihatinan Kerajaan terhadap inisiatif pertanian pintar atau pertanian moden ini juga dapat dilihat semasa pembentangan Bajet 2020 apabila sebanyak RM43 juta telah diperuntukkan ke arah pembangunan Industri Pertanian 4.0 seterusnya dapat memacu ekonomi negara melalui sektor agromakanan.

6. Selain peruntukan khusus pada tahun 2020 bagi pembangunan Industri Pertanian 4.0, Kementerian telah memperkenalkan pelbagai inisiatif bagi membiayai lebih ramai golongan pekebun dan petani untuk menceburi pertanian pintar antaranya seperti berikut:

(i) **Menyediakan peruntukan berjumlah RM5.79 juta** melalui Agrobank yang merupakan agensi pelaksana Skim Pembiayaan Mekanisasi dan Automasi bagi perolehan peralatan dan sistem mekanisasi dan automasi seperti jentera, traktor dan lain-lain;

(ii) **Memberi bantuan geran Agropreneur Muda** berbentuk barangan dan servis (*in-kind contribution*) sehingga RM20,000;

(iii) **Menyediakan peruntukan sebanyak RM120,000** bagi pelaksanaan kursus kilang tanaman oleh MARDI dan disasarkan kepada petani-petani moden yang berminat untuk menjalankan penanaman secara kilang tanaman menggunakan teknologi *Internet of Things* (IoT);

(iv) **Menyediakan khidmat nasihat teknikal melalui jabatan/agensi** berkaitan di bawah Kementerian bagi meningkatkan pengetahuan dan permindahan teknologi terkini kepada para petani; dan

(v) **Memberikan latihan pemasaran digital kepada usahawan agromakanan** untuk membolehkan mereka memasarkan produk secara cekap dan berkesan di dalam era ekonomi digital. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB TUAN AHMAD JOHNNIE BIN ZAWAWI (IGAN)

TARIKH : 12 NOVEMBER 2019

SOALAN

Tuan Ahmad Johnnie bin Zawawi [Igan] minta **MENTERI DALAM NEGERI** menyatakan berapa jumlah kes-kes penyalahgunaan dadah dan judi dalam talian di kawasan Parlimen Igan serta kes-kes jenayah yang lain serta apakah langkah-langkah untuk mengatasinya.

JAWAPAN

Tuan Yang Di Pertua,

Berdasarkan statistik daripada Polis Diraja Malaysia (PDRM), bagi tempoh 1 Januari 2019 hingga 15 September 2019, sebanyak 3 tindakan penguatkuasaan berkaitan perjudian atas talian telah dilakukan di Parlimen Igan. Hasil daripada penguatkuasaan tersebut, seramai 3 orang telah ditangkap dan rampasan wang tunai sebanyak RM 10,714.00 turut dibuat.

Manakala statistik jenayah di Parlimen Igan pula, secara keseluruhannya jenayah indeks yang dilaporkan di Ibu Pejabat Polis Daerah Mato Daro bagi tempoh 1 Januari 2019 hingga 15 September 2019 adalah sebanyak 21 kes. Daripada jumlah tersebut, sebanyak 4 kes melibatkan jenayah kekerasan manakala baki 17 kes lagi adalah jenayah harta benda.

Berhubung kes penyalahgunaan dadah pula berdasarkan statistik daripada Agensi Antidadah Kebangsaan (AADK), terdapat seramai 9 orang telah ditahan kerana terlibat dengan kes penyalahgunaan dadah di kawasan Parlimen Igan bagi tempoh Januari hingga September 2019.

Tuan Yang Di Pertua,

Kementerian Dalam Negeri melalui agensi-agensi di bawahnya seperti Polis Diraja Malaysia (PDRM) dan Agensi Antidadah Kebangsaan (AADK) sentiasa komited dalam usaha membanteras sebarang bentuk kegiatan jenayah termasuklah perjudian serta penagihan dadah di seluruh negara melalui langkah-langkah seperti berikut:

- 1) meningkatkan hubungan kerjasama dengan pelbagai agensi Kerajaan/Swasta, Pejabat Daerah, NGO, Persatuan Penduduk, JKKK dan masyarakat dalam pengkongsian maklumat;
- 2) meningkatkan aktiviti risikan dan penguatkuasaan bagi membanteras tempat-tempat yang dijadikan sarang perjudiaan, penagihan dan pengedaran dadah;

SOALAN NO : 20

- 3) Mengadakan program-program penerangan kepada masyarakat bagi menerangkan akan bahaya jika terlibat dengan kegiatan jenayah, perjudian mahupun pengedaran atau penagihan dadah;
- 4) memperkasakan program-program pemulihan dadah di bawah AADK melalui pelan rawatan dan pemulihan yang komprehensif dan terkini;
- 5) Memperkasakan jalinan kerjasama dengan rakan strategik di bawah Pusat Pemulihan Dadah Persendirian (PPDP) melalui penyediaan dana yang mencukupi oleh Kerajaan dalam menyokong usaha bersama memerangi gejala penyalahgunaan dadah;
- 6) melaksanakan program *Home Visit* bagi memberi sokongan kepada OKP yang terlibat untuk kekal pulih dan dalam masa yang sama, dapat menyalurkan maklumat kepada keluarga OKP dan masyarakat setempat berkenaan perkhidmatan-perkhidmatan yang disediakan oleh pihak AADK; dan
- 7) Kementerian juga telah turut dilibatkan dalam kajian undang-undang berkaitan perjudian yang sedang dijalankan oleh Kementerian Kewangan Malaysia (MOF) untuk ditambah baik supaya sentiasa selaras dengan perkembangan semasa.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB TUAN RAMKARPAL SINGH A/L KARPAL
SINGH (BUKIT GELUGOR)**

TARIKH : 12 NOVEMBER 2019

SOALAN

TUAN RAMKARPAL SINGH A/L KARPAL SINGH [BUKIT GELUGOR]
minta **MENTERI DALAM NEGERI** menyatakan secara spesifiknya
sekiranya Akta Hasutan 1948 akan dimansuhkan seperti yang dijanjikan
oleh Kerajaan dan sekiranya ya, bilakah ia akan dimansuhkan.

JAWAPAN

Tuan Yang Di Pertua,

Kerajaan tetap komited dan proaktif untuk merealisasikan komitmen yang dinyatakan di dalam manifesto Kerajaan Pakatan Harapan termasuklah yang berkaitan dengan undang-undang. Dalam hal ini, Kementerian Dalam Negeri telah pun menubuhkan sebuah Jawatankuasa Khas untuk melaksanakan kajian ke atas undang-undang berkaitan keselamatan termasuklah Akta Hasutan 1948. Jawatankuasa Khas tersebut yang dianggotai oleh pihak-pihak yang berkepentingan seperti Jabatan Peguam Negara (AGC), Polis Diraja Malaysia (PDRM), Badan Peguam Malaysia, Suruhanjaya Hak Asasi Manusia (SUHAKAM) dan beberapa badan bukan kerajaan (NGO) ditubuhkan untuk menilai dan memperhalusi setiap peruntukan di dalam undang - undang berkenaan berdasarkan piawaian hak asasi manusia selain mengenal pasti implikasi - implikasi keselamatan yang akan timbul jika dimansuhkan.

Berdasarkan hasil kajian yang dijalankan, pemansuhan Akta Hasutan 1948 memerlukan penelitian yang lebih mendalam terutamanya perkara-perkara berkaitan seksyen - seksyen khusus mengenai kesalahan-kesalahan yang melibatkan institusi diraja, kaum dan agama. Aspek penelitian tersebut termasuklah antara lainnya, sama ada perkara-perkara mengenai kesalahan tersebut dipindahkan dan dimasukkan ke dalam undang - undang lain sedia ada seperti Kanun Keseksaan atau pun diwujudkan suatu undang-undang baharu mengenainya.

Pada masa ini, Kementerian Dalam Negeri, Jabatan Peguam Negara dan agensi-agensi kerajaan yang lain sedang meneliti perkara tersebut bagi memastikan perkara-perkara yang berkaitan perlindungan institusi diraja, kaum dan agama sentiasa dipelihara. Ini bagi memastikan tiada kelompangan undang-undang berlaku dan keselamatan negara terus terjamin sekiranya Akta Hasutan 1948 dimansuhkan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB DATUK SERI TIONG KING SING (BINTULU)

TARIKH : 12 NOVEMBER 2019

SOALAN

DATO' SERI TIONG KING SING [BINTULU] minta MENTERI DALAM NEGERI menyatakan:

- (a) apakah Kerajaan berhasrat untuk mengkaji semula kebajikan anggota Polis Diraja Malaysia; dan
- (b) apakah cadangan penambahbaikan yang bakal dilaksanakan.

JAWAPAN

Tuan Yang Di Pertua,

Kementerian Dalam Negeri (KDN) dan Polis Diraja Malaysia (PDRM) sentiasa meneliti dan membuat kajian secara berterusan untuk menambahbaik skim perkhidmatan, elaun-elaun serta kemudahan lain untuk membantu anggota-anggota PDRM terutama yang berpangkat rendah dalam menangani kos sara hidup yang kian meningkat.

Antara tindakan yang telah diambil bagi tujuan menjaga kebajikan dan mengurangkan bebanan anggota PDRM adalah seperti berikut:

- i) Bagi memberikan keselesaan dan mengurangkan kos sewa rumah yang tinggi terutama di bandar-bandar besar, PDRM telah diberikan peruntukan sebanyak RM21,824 juta di bawah objek sebagai (OS) 32000 untuk menyelenggara kuarters kediaman dan pembaikan pejabat dan kemudahan lain. Selain itu, terdapat 27 projek pembangunan baharu dan sambungan di bawah Rancangan Malaysia Ke-11 (RMKe-11) yang sedang dilaksanakan di mana semua projek ini kelak akan menyediakan prasarana dan infrastruktur yang kondusif kepada anggota dan keluarga. Bagi tahun 2019, PDRM telah diperuntukkan sebanyak RM100 juta untuk pembaikan kuarters dan RM100 juta lagi untuk kerja-kerja pembaikan dan penggantian lif PDRM di seluruh Malaysia. Kerja-kerja pembaikan ini melibatkan pembaikan 10,040 unit kuarters dan penggantian 201 buah lif;
- ii) Bagi memastikan kesihatan anggota, PDRM telah mendirikan Pusat Saringan Kesihatan (PSK) sebagai projek perintis di Bukit Aman bagi anggota mendapatkan rawatan awal atau merawat penyakit yang bukan kronik. Projek ini dilaksanakan bertujuan bagi mengurangkan kos perubatan kepada anggota selain dari kemudahan rawatan percuma yang diterima di hospital Kerajaan. Antara pemeriksaan yang dijalankan di PSK adalah pemeriksaan berat badan, tekanan darah, kandungan gula dalam darah, *pap*

SOALAN NO : 22

smear dan konsultasi doktor. Sebagai rekod, pada tahun 2017, seramai 4,269 warga kerja PDRM telah melakukan pemeriksaan di pusat ini. Bagi tahun ini sehingga 31 Ogos 2018, seramai 1,593 warga kerja PDRM telah mendapat manfaat dari kewujudan pusat ini. Langkah ini dapat mengurangkan kebergantungan kepada klinik swasta untuk mendapatkan rawatan dan inisiatif ini akan dikemukakan kepada Kerajaan untuk diperluaskan ke seluruh negara di masa hadapan;

- iii) Selain PSK, PDRM turut menyediakan pusat hemodialisis kepada anggota PDRM yang menghidap sakit buah pinggang. Sehingga kini terdapat 19 buah pusat telah didirikan di seluruh negara dan rawatan yang diberikan adalah secara percuma;
- iv) PDRM juga mengambil maklum dengan bebanan kewangan yang dihadapi oleh anggota PDRM. Justeru, PDRM menyediakan TASKA di tempat kerja dan di kompleks perumahan PDRM bagi mengurangkan kos penjagaan anak-anak. Di samping itu juga, rumah transit turut disediakan untuk keluarga yang mengiringi pesakit di hospital;
- v) PDRM turut menyediakan bantuan kepada anak-anak yatim, anak kurang upaya (OKU), bantuan pelajaran, hadiah perkahwinan dan bantuan khairat kematian melalui tabung kebajikan PDRM dan tabung-tabung lain yang ada dalam PDRM; dan
- vi) Menyediakan secara percuma pengangkutan pergi dan balik ke sekolah untuk anak-anak pegawai dan anggota Pasukan Gerakan Am (PGA) dengan mengambil kira bahawa semua pegawai dan anggota PGA tinggal di dalam kem dan tempoh penugasan PGA yang lama di perbatasan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : PUAN KASTHURIRAANI A/P PATTO
[BATU KAWAN]**

TARIKH : 12 NOVEMBER 2019 (SELASA)

SOALAN NO. 23

Minta **MENTERI PENDIDIKAN** menyatakan jika sukatan pelajaran hak asasi manusia, asas politik, sejarah dunia yang lebih inklusif dan pendidikan seks, terutama sekali mengenai hak kanak-kanak, jenayah seksual dan keganasan rumah tangga akan diperkenalkan, adakah Kementerian berhasrat untuk mewujudkan sistem loker di sekolah rendah dan menengah supaya para pelajar tidak dibebani dengan membawa buku-buku yang berat ke sekolah dan pulang.

JAWAPAN

Tuan Yang di-Pertua,

Kementerian Pendidikan Malaysia (KPM) melaksanakan Pendidikan Kesihatan Reproduktif dan Sosial (PEERS) yang merangkumi elemen 'pendidikan seksualiti' melalui kurikulum Pendidikan Kesihatan sejak tahun 1989 di sekolah menengah dan bermula tahun 1994 di sekolah rendah. Silibus PEERS yang merangkumi topik seperti hak kanak-kanak, jenayah seksual dan keganasan rumahtangga digubal berdasarkan kepada tahap perkembangan kognitif serta kesesuaian peringkat umur kumpulan sasaran. PEERS diajar bermula dari peringkat prasekolah hingga Tingkatan Lima di semua sekolah di bawah Kementerian Pendidikan Malaysia.

Kurikulum Sejarah yang sedang dilaksanakan kini sama ada di sekolah rendah atau di sekolah menengah, turut memberi pendedahan kepada murid tentang asas politik dan sejarah dunia. Dalam kurikulum sejarah juga terkandung unsur-unsur pendidikan hak asasi manusia. Begitu juga dalam Pendidikan Sivik, murid diajar mengenai hak asasi di bawah tajuk nilai bertanggungjawab dan pelbagai tajuk lain secara eksplisit.

Berkaitan dengan pemasangan *locker* sebagai langkah mengurangkan berat beg sekolah murid, KPM ingin memaklumkan bahawa cadangan pemasangan *locker* tersebut adalah termasuk dalam pembekalan peralatan dan perabot sekolah yang perlu dibuat bersekali dengan perancangan pembinaan bangunan sekolah, sekiranya terdapat keperluan. Walau bagaimanapun, pemasangan *locker* di sekolah sedia ada bergantung kepada kesesuaian dan diuruskan berasingan oleh sekolah masing-masing dan inisiatif Persatuan Ibu bapa dan Guru (PIBG) ataupun Lembaga Pengurus Sekolah (LPS).

Untuk makluman, sebanyak tiga (3) kajian yang berkaitan telah dibuat pada tahun 2000, 2008 dan 2010. Dapatan daripada semua kajian menunjukkan bahawa peratus berat buku teks sahaja adalah di antara 3.21 peratus hingga 7.60 peratus berbanding berat badan murid. Peratus ini di bawah 15 peratus iaitu peratus berat paling maksimum yang dicadangkan oleh pertubuhan antarabangsa. Walau bagaimanapun, berat beg yang berlebihan adalah disebabkan oleh faktor-faktor lain selain buku teks.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' SERI HAJI IDRIS BIN JUSOH [BESUT]

TARIKH : 12 NOVEMBER 2019 (SELASA)

SOALAN NO. 24

Minta **MENTERI PENDIDIKAN** menyatakan senarai peranan pihak industri dalam membantu kebolehpasaran graduan, khasnya dalam usaha mempersiapkan diri para pelajar sebelum memasuki alam pekerjaan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian melalui Jabatan Pendidikan Tinggi sentiasa memastikan bahawa pengisian pembelajaran di peringkat universiti adalah selari dengan permintaan pasaran pekerjaan dan keperluan industri. Pelbagai program kerjasama yang terjalin antara pihak industri dan kementerian dengan bermatlamat ke arah meningkatkan kebolehpasaran graduan telah dilaksanakan dan berfokus kepada program berimpak tinggi.

Antaranya adalah melalui pengenalan *Academia Talent Exchange Programme* (AI-xChange) : *CEO @ Faculty Programme*, di mana pelajar-pelajar didedahkan dengan perkongsian pengalaman dan kemahiran kolaborasi antara akademia dan pihak industri, melalui syarahan dan slot interaksi dengan pelbagai tokoh syarikat berkaitan kerajaan (GLC) dan industri terkemuka antarabangsa serta tempatan. Pada tahun 2019, program ini telah berjaya mendapat penyertaan seramai 64 orang CEO yang terdiri daripada pelbagai sektor industri.

Antara keberhasilan dan impak dalam pengajaran dan pembelajaran melalui program adalah mahasiswa berpeluang memahami dunia sebenar melalui perkongsian pengalaman CEO daripada segi pengurusan pentadbiran, kepimpinan dan teknologi di lapangan. Perkongsian amalan terbaik dari sudut pandangan CEO membolehkan pelajar berfikir lebih kreatif dan inovatif serta berupaya berfikir di luar kotak, seterusnya mewujudkan pembelajaran lebih holistik.

Dalam usaha untuk memastikan program TVET relevan dengan keperluan industri, KPM telah dan sedang menjalinkan kerjasama dengan pihak swasta / industri dalam memperkasakan TVET. Sehingga kini, sebanyak 825 *Memorandum of Understanding* (MoU) telah dibuat bersama industri sejak tahun 2013, sebanyak 609 *Note of Understanding* (NoU) serta sebanyak 5,137 *Letter of Intent* (LOI) telah ditandatangani.

KPM juga telah menandatangani MoU bersama pihak Sabah Shell, Sarawak Shell, Panasonic, Perodua, *United Engineers Malaysia Berhad* (UEM) dan Kedah Industrial Skills and Management Development Centre (KISMEC). Kerjasama strategik dengan industri ini amat penting dalam memastikan kebolehpasaran graduan TVET khususnya graduan kolej vokasional

KPM melalui Jabatan Pendidikan Politeknik dan Kolej Komuniti (JPPKK) menekankan peranan industri dalam membantu meningkatkan kebolehpasaran graduan melalui pelbagai program khas, iaitu:

1. Program *Industry on Campus* dengan membawa persekitaran sebenar industri ke dalam proses pengajaran dan pembelajaran bertujuan untuk merapatkan jurang atribut graduan dengan keperluan sebenar industri;
2. Sumbangan atau perkongsian peralatan di mana industri membawa masuk peralatan ke dalam institusi;
3. *Research & Development* bersama industri yang melibatkan penambahbaikan produk/servis termasuk Jaringan Penyelidikan Awam-Swasta (PPRN);

4. Penubuhan Majlis Penasihat Industri (MPI) berperanan memberi khidmat nasihat dalam aktiviti akademik dan kolaborasi; dan
5. Penubuhan Jawatankuasa Penasihat Kebolehpasaran (EAC) berperanan menyediakan maklumat hala tuju industri dan implikasinya terhadap permintaan dan bekalan tenaga kerja serta memberi input mengenai isu-isu sektor negara bagi meningkatkan kebolehpasaran graduan.

Ini akan dapat meningkatkan kebolehpasaran graduan dan mengurangkan ketidaksepadanan di dalam penawaran dan permintaan pasaran kerja. Selain itu juga, integrasi dan sinergi antara tenaga pakar industri dengan penyelidik universiti dan pelajar dapat diwujudkan. IPT juga berjaya beralih daripada beroperasi secara bersendirian kepada *quadruple helix* iaitu ekosistem inovasi yang saling berkaitan antara akademik, industri, kerajaan dan komuniti yang telah membentuk perkongsian sumber untuk pembangunan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN MUSLIMIN BIN YAHAYA
[SUNGAI BESAR]**

TARIKH : 12 NOVEMBER 2019 (SELASA)

SOALAN NO. 25

Minta **MENTERI PENDIDIKAN** menyatakan menyatakan langkah yang telah diambil untuk mengurangkan beban dan waktu perkeranian guru-guru di sekolah.

JAWAPAN

Tuan Yang di-Pertua,

Kementerian Pendidikan Malaysia (KPM) sedar bahawa tugas pentadbiran berlebihan mengambil masa urusan teras guru dalam pengajaran dan pembelajaran, serta mengurangkan keberkesanan pengajaran mereka disebabkan oleh gangguan tumpuan terhadap fungsi teras.

Oleh yang demikian, KPM telah mengambil pelbagai langkah bagi memastikan bagi mengurangkan beban tugas pentadbiran yang ditanggung oleh guru. Pada tahun 2019, KPM telah memperkenalkan 10 inisiatif seperti yang telah diumumkan semasa Perutusan Tahun Baharu 2019 dan pada Majlis Sambutan Hari Guru yang lalu, iaitu:

1. Memudahkan pengurusan fail dan dokumentasi Skim Pinjaman Buku Teks, Fail Panitia dan Pelaporan Pentaksiran Bilik Darjah;
2. Pengurusan data guru dan murid dikumpul dan diambil daripada sumber data sedia ada dan penggunaan Sistem Kehadiran Murid dalam talian;

3. Pelaksanaan Literasi dan Numerasi (LINUS) dirangka oleh sekolah sesuai dengan keperluan murid susulan pemansuhan Peperiksaan Tahap 1;
4. Penyeragaman borang dan proses pemantauan bagi Borang Penarafan Kendiri Kantin dan Borang Prestasi Perkhidmatan Kontraktor Pembersihan dan Keselamatan;
5. Penyelarasan penubuhan jawatankuasa di peringkat sekolah bagi memastikan pelbagai jawatankuasa yang tidak berkaitan dengan tugas mendidik dimansuhkan;
6. Semakan secara berkala dan penyediaan dokumen/eviden berkaitan SKPMg2;
7. Pengawasan peperiksaan dilaksanakan pada waktu sekolah dan analisis peperiksaan dijana secara automatik;
8. Pengisian Rekod Kesihatan Murid secara dalam talian (e-RKM) tanpa guru mengisi maklumat murid;
9. Pemansuhan Ujian Aptitud Tahun 3 di sekolah yang tiada guru Bimbingan dan Kaunseling; dan
10. Peruntukan Guru Ganti disalurkan kepada semua Jabatan Pendidikan Negeri pada awal tahun dan pengambilan Guru Interim bagi mengisi kekosongan guru yang ada.

Dalam masa yang sama, KPM melalui Jawatankuasa Mengkaji Beban Guru akan terus meneliti inisiatif yang boleh membantu meringankan beban tugas guru melalui perbincangan bersama Jabatan Pendidikan Negeri (JPN), Kesatuan Perkhidmatan Perguruan Kebangsaan Malaysia (NUTP), Majlis Pengetua Sekolah Malaysia (MPSM) dan Majlis Guru Besar (MGB). Di samping itu juga, pemantauan terhadap pelaksanaan inisiatif-inisiatif yang telah dilaksanakan akan dijalankan oleh Jawatankuasa ini.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : DATUK HAJI SHABUDIN BIN YAHAYA
[TASEK GELUGOR]

TARIKH : 12 NOVEMBER 2019 (SELASA)

SOALAN NO. 26

Minta **MENTERI PENDIDIKAN** menyatakan adakah pihak Kementerian ada bercadang untuk menambahbaik atau mengkaji semula "*Standard Operating Procedure (SOP)*" atau peraturan di setiap sekolah yang terjejas teruk dengan suatu pencemaran dan adakah guru serta pelajar di kawasan yang berisiko tinggi telah dipersiapkan dengan latihan khusus bagi menghadapi kebarangkalian berlaku pencemaran atau apa-apa bencana.

JAWAPAN

Tuan Yang di-Pertua,

Kementerian Pendidikan Malaysia (KPM) mengambil berat akan isu pencemaran atau bencana yang menjejaskan kesihatan dan keselamatan murid dan guru di sekolah. KPM telah mengeluarkan surat pekeliling ikhtisas dan surat siaran sebagai panduan persediaan menghadapi pencemaran atau bencana seperti berikut:

1. Surat Pekeliling Ikhtisas Bil. 21/1998 'Persediaan Menghadapi Bencana Alam';
2. Surat Pekeliling Ikhtisas Bil. 9/2009 'Penubuhan Jawatankuasa Bencana di Peringkat Kementerian Pendidikan Malaysia, Jabatan Pendidikan Negeri, Pejabat Pendidikan Daerah dan Sekolah';
3. Surat Siaran KPM Bilangan 1 Tahun 2019 'Langkah-langkah KPM bagi Menjamin Kesihatan dan Keselamatan Murid-murid di Sekolah-sekolah yang Berada dalam Kawasan Berjerebu yang Dianggap Kritikal'; dan
4. Surat Siaran KPM Bilangan 8 Tahun 2016 'Garis Panduan Pengurusan Pengajaran dan Pembelajaran Akibat Bencana'.

Berkaitan dengan latihan menghadapi bencana, KPM melalui Jawatankuasa Bencana di Peringkat Sekolah mengadakan latihan kesiapsiagaan sebagaimana dinyatakan dalam Surat Makluman Pengurusan Menghadapi Bencana Sekolah bertarikh 25 Jun 2015. KPM juga telah mengeluarkan Buku Panduan Konsep dan Manual Sekolah Selamat sebagai panduan kepada pihak pengurusan sekolah dan guru bagi memastikan keselamatan dan kesejahteraan murid terpelihara.

KPM bersedia untuk bekerjasama dengan mana-mana agensi yang berkaitan dan sentiasa terbuka terhadap sebarang cadangan untuk menilai dan menambah baik SOP sedia ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 12 NOVEMBER 2019

SOALAN NO. 27

Minta **MENTERI PERTANIAN DAN INDUSTRI ASAS TANI** menyatakan senarai syarikat-syarikat pembekal racun kepada NAFAS dengan maklumat berikut:

- (a) Jumlah kuantiti dan nilai bekalan kepada NAFAS; dan
- (b) Jumlah hutang yang belum NAFAS bayar bagi setiap syarikat dan hutang yang paling lama tertunggak.

JAWAPAN

Tuan Yang di-Pertua,

1. Untuk makluman Ahli Yang Berhormat, Pertubuhan Peladang Kebangsaan (NAFAS) merupakan pembekal yang telah dilantik oleh pihak Kerajaan untuk membekalkan racun makhluk perosak di bawah Skim Insentif Pengeluaran Padi (SIPP). Pada tahun 2018, sebanyak 13 syarikat pembekal racun makhluk perosak telah membekalkan racun makhluk perosak kepada NAFAS.
2. Sebanyak 85 jenis kategori racun makhluk perosak yang dibekalkan kepada pesawah dengan kadar pemberian RM200 sehektar seperti racun serangga, rumpai, kulat, tikus, siput dan lain-lain yang bernilai RM140 juta pada tahun 2018.
3. Pihak Kerajaan hanya melantik NAFAS untuk melaksanakan pembekalan racun makhluk perosak kepada pesawah. Sehubungan itu, pihak Kementerian tidak mempunyai maklumat berhubung jumlah hutang kerana perkara sedemikian adalah merupakan urusan perniagaan syarikat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE DUA,
PARLIMEN EMPATBELAS**

PERTANYAAN : JAWAB LISAN

DARIPADA : YB TUAN OSCAR LING CHAI YEW (SIBU)

TARIKH : 12 NOVEMBER 2019

SOALAN

TUAN OSCAR LING CHAI YEW [SIBU] minta **MENTERI DALAM NEGERI** menyatakan bahawa adakah Ops Blue Devil ada bertindak di Sarawak. Jika ada, berapakah anggota polis telah terlibat dalam penggunaan dadah dan tindakan selanjutnya kepada anggota polis yang terlibat. Apakah sebab begitu banyak anggota polis yang terlibat dalam dadah dan apakah langkah akan diambil untuk mengatasi masalah ini.

JAWAPAN

Tuan Yang Di-Pertua,

Kementerian Dalam Negeri (KDN) ingin menegaskan bahawa tiada kompromi terhadap mana-mana anggota Polis Diraja Malaysia (PDRM) yang didapati terlibat dalam sebarang aktiviti jenayah berkaitan dadah. PDRM menerusi Jabatan Siasatan Jenayah Narkotik telah melancarkan operasi khas yang dikenali sebagai *Ops Blue Devil* pada 13 Ogos 2019 bagi membanteras penyalahgunaan dadah dalam kalangan anggota PDRM di setiap kontijen. Seramai 174 pegawai dan anggota PDRM di Sarawak telah menjalani ujian saringan air kencing bagi mengesan penyalahgunaan dadah. Sehingga bulan September 2019, seramai 7 anggota dari Kontinjen Sarawak di dapati positif dadah jenis syabu, amphetamine, opiate, ganja dan ketamin.

Dalam hubungan ini, siasatan akan dijalankan terhadap mana-mana anggota yang didapati positif dadah. Tindakan undang-undang akan diambil sama seperti orang awam yang lain selepas mendapat keputusan dari Jabatan Patologi. Di samping itu, tindakan tatatertib juga akan diambil ke atas anggota terlibat.

Tuan Yang Dipertua,

Berdasarkan hasil siasatan, faktor penglibatan anggota PDRM di dalam penyalahgunaan dadah antara lainnya adalah:

- 1) Pengaruh rakan sekerja;
- 2) Masalah peribadi;
- 3) Keinginan untuk mencuba;
- 4) Tekanan; dan
- 5) Tempoh masa bertugas yang panjang.

Oleh itu, bagi mengatasi gejala tersebut agar tidak berleluasa di dalam pasukan, PDRM telah mengambil langkah-langkah berikut :

- 1) Mengeluarkan Manual Pematuhan Standard PDRM yang akan menjadi mekanisma “kawal selia” dalam memastikan pematuhan kepada semua arahan, peraturan dan undang-undang;
- 2) Mengadakan program-program psikologi dan spritual atau agama bagi warga PDRM yang mempunyai masalah disiplin atau tatatertib;
- 3) Mengeluarkan *Organisation Anti-Corruption Plan* (OACP) yang bertindak sebagai pemacu budaya organisasi berpaksikan integriti dan pematuhan standard;
- 4) Mewujudkan kod etika PDRM bagi memastikan setiap tingkah laku hendaklah berasaskan nilai-nilai murni yang telah diperaku dan diterjemahkan melalui kod etika PDRM;
- 5) Menjalankan pemeriksaan dan *integrity testing* ke atas semua warga kerja PDRM di semua penugasan dalam pasukan bagi memastikan pematuhan kepada undang-undang, peraturan, arahan pentadbiran dan prosedur kerja yang berkuat kuasa serta menepati standard yang ditetapkan;
- 6) Tidak berkompromi ke atas warga PDRM yang melakukan kesalahan tatatertib dan mengambil tindakan tegas termasuk buang kerja atau turun pangkat; dan
- 7) Hebahan *lesson learnt* bagi memberi iktibar dan pengajaran serta mengelakkan kejadian yang sama berulang dimasa akan datang.

SOALAN NO : 28

Berikut adalah statistik *ops blue devil* sepanjang di lancarkan mulai 13 Ogos 2019 :-

**PELAPORAN OPS BLUE DEVIL
TINDAKAN DI BAWAH PERATURAN 7
PERATURAN-PERATURAN PEGAWAI AWAM (KELAKUAN &
TATATERTIB) 1993
BAGI TEMPOH 13.8.2019 SEHINGGA 25.9.2019**

BIL	KONTINJEN	TANGKAPAN OLEH JSIN					PERATURAN 7 PERATURAN-PERATURAN PEGAWAI AWAM (KELAKUAN DAN TATATERTIB) 1993				
		JUM POSITIF	LAPORAN PATOLOGI			TUDUH	JUM POSITIF	RUJUK PEGAWAI PERUBATAN	LAPORAN PEGAWAI PERUBATAN		
			POSITIF PATOLOGI	NEGATIF PATALOGI	BELUM DAPAT LAPORAN				POSITIF	NEGATIF	BELUM DAPAT JAWAPAN
2	KEDAH	9	0	5	4	1	9	7	0	0	7
3	JOHOR	12	4	0	8	2	12	1	1	0	0
4	KELANTAN	8	1	0	7	1	8	0	0	0	0
5	KUALA LUMPUR	20	4	6	10	1	20	20	0	0	20
6	MELAKA	11	7	2	2	5	11	9	0	1	8
7	NEGERI SEMBILAN	6	4	2	0	0	6	2	0	2	0
8	PULAU PINANG	7	0	2	5	0	7	7	5	1	0
9	PAHANG	9	3	2	4	0	9	6	0	0	0
10	PERAK	11	2	3	6	1	11	5	0	0	5
11	PERLIS	2	2	0	0	0	2	1	0	0	1
12	SABAH	6	4	0	2	4	6	2	1	0	1
13	SARAWAK	7	4	0	3	0	7	5	1	0	4
14	SELANGOR	28	19	5	4	10	28	19	9	10	0
15	TERENGGANU	1	0	1	0	0	1	0	0	0	0
JUMLAH		137	54	28	55	25	137	84	17	14	46

**Sumber : Cawangan Siasatan/ Perundangan/ Kajian Kes (JIPS)
berakhir 25.9.2019**

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 12 NOVEMBER 2019 (SELASA)

SOALAN

Minta **MENTERI PERTANIAN DAN INDUSTRI ASAS TANI** menyatakan apakah pendekatan Kerajaan Pusat dalam membangunkan industri tuna di Pulau Pinang ekoran perubahan Akta Perikanan di Parlimen baru-baru ini. Adakah akan terdapat cadangan untuk membangunkan dermaga ikan antarabangsa di negeri berkaitan (khususnya untuk industri ikan tuna) ekoran fungsinya sebagai pangkalan utama urus niaga hasil laut kini. Jika tidak, kenapa dan apakah inisiatif lanjut.

JAWAPAN

1. Pada tahun 2012, Kementerian melalui Jabatan Perikanan Malaysia (DOF) telah membangunkan *Fleet Development Plan* di bawah *Indian Ocean Tuna Commission* (IOTC) yang berpotensi untuk mendaratkan sebanyak 30,000 tan metrik tuna oseanik dengan nilai berjumlah RM300 juta setahun. Tuna oseanik merujuk kepada spesies tuna seperti *Skipjack*, *Albacore*, *Yellowfin*, *Bigeye* dan *Bluefin* yang terdapat di lautan antarabangsa seperti Lautan Hindi.

2. Akta Perikanan 1985 (Akta 317) telah dibuat pindaan untuk menambahbaik peruntukan perundangan sedia ada bagi membolehkan penggubalan peraturan bagi tujuan pemantauan, pengawalan dan pengawasan ke atas vesel penangkapan ikan tempatan di laut lepas.

3. Setelah Pindaan Akta Perikanan 1985 diluluskan, Kerajaan telah mengambil beberapa pendekatan bagi membangunkan industri tuna di Pulau Pinang seperti berikut:

- Mensasarkan peningkatan pendaratan tuna oseanik Lautan Hindi kepada 5,000 metrik tan pada tahun 2020. Pada tahun 2018, sebanyak 3,165 tan metrik dengan anggaran nilai RM33 juta telah didaratkan oleh 17 vesel penangkapan tuna yang aktif beroperasi di Lautan Hindi.
- Mengadakan sesi libat urus bersama pemain industri tuna di Pulau Pinang bagi melihat keperluan pembangunan keseluruhan rantai industri tuna negara. Penumpuan akan diberikan melalui kerjasama dengan pihak pelabuhan untuk membangunkan perkhidmatan dan kemudahan di pelabuhan bagi pematuhan tatacara perolehan vesel serta pembinaan vesel.
- Mengukuhkan keupayaan pemain industri dan jalinan kerjasama serta perkongsian maklumat melalui penubuhan persatuan di kalangan pemain industri tuna sedia ada.

Persatuan ini juga berperanan dalam memastikan ahlinya sentiasa mematuhi piawaian yang ditetapkan oleh IOTC dan seterusnya meningkatkan imej Malaysia di peringkat antarabangsa.

- Membangunkan *Standard Operating Procedure* (SOP) bagi pelaksanaan *Port State Measure* kepada semua vesel yang beroperasi di Lautan Hindi yang mendarat di Pulau Pinang selaras dengan komitmen Malaysia sebagai ahli di bawah IOTC.

4. Pada masa ini, Kementerian hanya mendaftar dua buah pelabuhan dengan pihak IOTC sebagai dermaga ikan antarabangsa (*designated tuna port*) iaitu Dermaga Air Dalam di Pulau Pinang dan Pelabuhan Tanjung Lembung di Langkawi. Justeru, tiada keperluan bagi cadangan untuk membangunkan dermaga ikan antarabangsa lain di Pulau Pinang kerana dermaga sedia ada terletak di lokasi paling strategik iaitu berhampiran dengan Lautan Hindi dan belum digunakan secara optimum.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KE DUA,
PARLIMEN KE EMPATBELAS**

PERTANYAAN : JAWAB LISAN

DARIPADA : DATO' SERI ANWAR BIN IBRAHIM

TARIKH : 12.11.2019

SOALAN

DATO' SERI ANWAR BIN IBRAHIM (PORT DIKSON) minta **MENTERI DALAM NEGERI** menyatakan apakah pihak kerajaan telah menjalankan kajian menyeluruh terhadap masalah penyalahgunaan dadah, rasuah, pemerasan dan ugutan terhadap pekerja-pekerja asing di kalangan anggota polis seperti mana pendedahan yang dibuat oleh Ketua Polis Negara pada 21 Ogos 2019 dan langkah komprehensif yang di cadangkan bagi mengatasi isu ini.

JAWAPAN

Tuan Yang Di-pertua,

Pada tahun 2017, Polis Diraja Malaysia (PDRM) melalui Bahagian Agama dan Kaunseling (BAKA), Jabatan Integriti Dan Pematuhan Standard (JIPS) telah menjalankan kajian berkenaan masalah penyalahgunaan dadah di kalangan anggota polis dan telah mengenalpasti punca-punca yang mengakibatkan warga PDRM terlibat dalam penyalahgunaan dadah seperti berikut:

- (i) Masalah peribadi;
- (ii) Keinginan untuk mencuba;
- (iii) Tekanan; dan
- (iv) Tempoh masa bertugas yang panjang.

Susulan kajian tersebut, pihak polis telah mengambil beberapa langkah komprehensif bagi mengatasi gejala ini seperti berikut:

- (i) Melaksanakan program Peningkatan Integriti My Psikologi Spiritual (MyPS) Indah bagi program pemulihan yang dianjurkan oleh BAKA JIPS khusus kepada warga PDRM yang terlibat dengan penyalahgunaan dadah;
- (ii) Mengeluarkan Manual Pematuhan Standard PDRM bagi memastikan pematuhan kepada semua arahan, peraturan dan undang-undang;
- (iii) Mengadakan program-program psikologi, spritual dan agama bagi warga PDRM yang mempunyai masalah disiplin atau tatatertib;
- (iv) Mengeluarkan *Organisation Anti-Corruption Plan* (OACP) bagi memacu budaya organisasi berpaksikan integriti dan pematuhan standard;

- (v) Mewujudkan kod etika PDRM bagi memastikan setiap tingkah laku hendaklah berasaskan nilai-nilai murni yang telah diperakukan dan diterjemahkan melalui kod etika PDRM;
- (vi) Menjalankan pemeriksaan dan *integrity testing* ke atas semua warga kerja PDRM di semua penugasan dalam pasukan bagi memastikan pematuhan kepada undang-undang, peraturan, arahan pentadbiran dan prosedur kerja yang berkuat kuasa serta menepati standard yang ditetapkan;
- (vii) Tidak berkompromi ke atas warga PDRM yang melakukan kesalahan tatatertib dan mengambil tindakan tegas termasuk buang kerja atau turun pangkat; dan
- (viii) Mengeluarkan *lesson learnt* bagi memberi iktibar dan pengajaran serta mengelakkan kejadian yang sama berulang dimasa akan datang.

Untuk makluman dewan yang mulia ini, PDRM masih belum menjalankan kajian ke atas kesalahan rasuah dan peras ugut terhadap pekerja asing. Walau bagaimanapun, PDRM melalui BAKA telah menyediakan pelbagai program kepada golongan sasaran terutamanya pegawai dan anggota yang dikenal pasti terlibat dengan pelbagai masalah jenayah atau dadah. Program ini sepertimana langkah-langkah yang komprehensif yang telah diambil tindakan oleh JIPS.

Bagi mengelakkan perkara peras ugut ini terus berlaku, Ketua Polis Negara telah mengeluarkan Arahan pada 21 Julai 2006 iaitu Larangan Pemeriksaan Terhadap PATI bagi mengelakkan tohmahan atau pelbagai aduan yang dilemparkan ke atas pihak polis. Arahan tersebut dikecualikan semasa menjalankan operasi yang bersifat bersepadu dan terancang yang dianjurkan oleh PDRM dengan bantuan agensi kerajaan yang lain atau operasi yang dirancang dan dilaksanakan atas faktor keperluan dan arahan semasa.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : BUKAN JAWAB LISAN

**DARIPADA : YB DATUK SERI PANGLIMA WILFRED MADIUS
TANGAU (TUARAN)**

TARIKH : 12 NOVEMBER 2019

SOALAN

DATUK SERI PANGLIMA WILFRED MADIUS TANGAU (TUARAN) minta **MENTERI DALAM NEGERI** menyatakan apakah penemuan "Special Task Force" yang dipertanggungjawabkan memberi jawapan "Where is Pastor Raymond Koh and Amri Che Mat"

JAWAPAN

Tuan Yang Di Pertua,

Bagi kes penculikan Raymond Koh dan Amri Che Mat, Kementerian Dalam Negeri telah menubuhkan satu Pasukan Petugas Khas bagi menyiasat semula kes kehilangan Pastor Raymond Koh dan Amri bin Che Mat. Siasatan bagi kes Pastor Raymond Koh akan dilaksanakan setelah selesainya perbicaraan di mahkamah. Pasukan Petugas Khas ini diberi mandat selama 6 bulan mulai 1 Julai 2019.

Pada masa ini, Kementerian Dalam Negeri tidak dapat memaklumkan kepada umum mengenai status kes-kes ini memandangkan pasukan ini masih dalam tindakan menyiasat. Laporan dan syor kepada Kerajaan akan dibentangkan kepada Jemaah Menteri terlebih dahulu.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' ROSOL BIN WAHID
[HULU TERENGGANU]**

TARIKH : 12 NOVEMBER 2019 (SELASA)

SOALAN NO. 32

Minta **PERDANA MENTERI** menyatakan langkah-langkah yang bakal dan telah diambil dalam memartabatkan kembali tulisan jawi sama ada melalui pendidikan mahupun media massa.

JAWAPAN

Tuan Yang di-Pertua,

Kementerian Pendidikan Malaysia (KPM) telah melaksanakan pelbagai langkah sama ada melalui pendidikan mahupun media massa bagi memastikan tulisan jawi dimartabatkan sebagai sejarah warisan negara dan seterusnya diperkasakan dalam kalangan murid berbilang bangsa. Antara langkah tersebut adalah seperti yang berikut, iaitu:

1. memperkenalkan aspek seni bahasa dalam kurikulum mata pelajaran Bahasa Melayu (KSSR) Tahap II iaitu Tahun 4 bermula tahun 2020;
2. menyelaraskan sistem ejaan jawi melalui pengemaskinian Pedoman Umum Ejaan Jawi Bahasa Melayu yang lengkap dengan daftar kata sebagai rujukan;
3. menyediakan ruang penulisan tulisan Jawi dalam majalah terbitan Dewan Bahasa dan Pustaka (DBP) seperti Tamadun Islam, Tunas Cipta, Dewan Pelajar dan lain-lain yang boleh disebarkan kepada semua murid pelbagai kaum;
4. menghasilkan bahan ilmiah dalam tulisan Jawi seperti Pedoman Transliterasi Huruf Arab ke Huruf Rumi, Perkembangan Tulisan Jawi dalam Masyarakat Melayu, Sejarah Perkembangan Tulisan Jawi dan Panduan Menulis dan Mengeja Jawi;
5. menjalankan kajian berteraskan tulisan Jawi dalam manuskrip lama dari sudut kebahasaan dan kesusasteraan untuk dimanfaatkan oleh masyarakat;
6. melantik Munsyi Dewan (Jawi) dalam kalangan penggiat tulisan Jawi. Sehingga kini, terdapat seramai 51 orang telah dilantik sebagai Munsyi Dewan (Jawi);

7. melaksanakan program dan klinik Jawi seperti Kursus Pembinaan Munsyi Dewan (Jawi) dan Kursus Pengkaedahan Jawi Guru KAFA;
8. menyediakan khidmat penyemakan dan pengesahan ejaan tulisan Jawi;
9. menjalinkan kerjasama dengan Majlis Dakwah Negara (MDN), dengan menubuhkan Panel Memperkasa Tulisan Jawi yang bertujuan menyatukan institusi, pertubuhan dan pihak yang berusaha memartabatkan penggunaan tulisan Jawi di negara ini;
10. memperkenalkan pengajaran dan pembelajaran tulisan jawi dalam kurikulum pendidikan Islam sejak pelaksanaan KBSR pada tahun 1982 dan diteruskan lagi dalam pelaksanaan KSSR semakan; dan
11. memperkenalkan Kelab Jawi dan Khat di sekolah sejak tahun 2008 melalui Surat pekeliling Ikhtisas Bilangan 1 Tahun 2008 berkaitan Penubuhan Persatuan Bahasa Arab dan Kelab Jawi dan Khat di Sekolah Rendah yang Melaksanakan Program j-QAF.

Bagi memastikan tiada pihak terkeliru dan salah anggap dengan pelaksanaan tulisan jawi di sekolah, KPM sedang mempergiatkan sesi libat urus bersama Persatuan Ibu Bapa dan Guru (PIBG) bagi menjelaskan tujuan sebenar pelaksanaan tulisan jawi di sekolah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE DUA,
PARLIMEN EMPATBELAS**

PERTANYAAN : JAWAB LISAN

DARIPADA : YB TUAN KARUPAIYA A/LMUTUSAMI (PADANG SERAI)

TARIKH : 12 NOVEMBER 2019

SOALAN

TUAN KARUPAIYA A/L MUTUSAMI [PADANG SERAI] minta **MENTERI DALAM NEGERI** menyatakan semasa perayaan keagamaan dan sambutan upacara tahunan kuil, kerap berlakunya pergaduhan dan pertelingkahan di sekitar kawasan Tannir Panthal. Saya mencadangkan kepada pihak polis untuk menaikkan pembayaran deposit sebanyak RM5000 untuk setiap penganjur dan mereka juga perlu mematuhi beberapa syarat yang telah ditetapkan oleh pihak polis. Contohnya, tidak membuka speaker terlalu kuat, tidak boleh minum arak, tidak boleh berjoget, tidak boleh membakar mercun, tidak memasang lagu yang bertentangan dengan agama, tidak boleh meletak sebarang peralatan berbahaya untuk pemujaan (parang, lembing) dan menjaga kebersihan kawasan.

JAWAPAN

Tuan Yang Di Pertua,

Untuk makluman Ahli Yang Berhormat, perhimpunan bagi tujuan keagamaan merupakan satu perhimpunan yang pemberitahuan tidak dikehendaki di bawah Jadual Ketiga, Akta Perhimpunan Aman (Pindaan) 2019. Oleh itu, penganjuran sebarang perayaan keagamaan tidak memerlukan pemberitahuan notis kepada pihak Polis.

Pihak polis tidak mengenakan sebarang deposit, cagaran ataupun sewaan kepada penganjur perhimpunan keagamaan. Sebarang bayaran deposit, cagaran dan sewaan adalah dikenakan oleh pemilik premis di tempat perhimpunan keagamaan tersebut diadakan. Oleh itu, adalah menjadi tanggungjawab penganjur untuk memastikan peserta perhimpunan tidak melakukan sebarang perbuatan yang melanggar undang-undang yang berkuatkuasa termasuk mengganggu ketenteraman awam dan menyebabkan kerosakan kepada harta atau alam sekitar.

Sekiranya berlaku kekacauan atau kekecohan semasa perhimpunan, pihak polis boleh mengambil apa-apa langkah yang perlu dalam memastikan perhimpunan dikendalikan dengan teratur termasuk mengeluarkan arahan untuk bersurai.